



Mm 79.3.






IO. ANTONII VIPERANI

DE OBTEŇTA PORTVGALIA
A REGE CATHOLICO
PHILIPPO

HISTORIA.
Collegii Parisiens. Societat. Jesu.



NEAPOLI,
Apud Horatium Saluiianum.
M. D. LXXXVIII.
Superiorum permissu.

R. 593.731

SERENISS.^{MO} PRINCIPI

ALBERTO S. R. E. CARD.

LEGATO.

ARCHIDVCI AVSTRIAE,

*ac pro Rege Philippo in Portugalia
regnis Gubernatori*

IO. ANTONIVS VIPERANVS.



Historiam Serenissime Al-
berte, quam de obtenta
Portugalia à Rege Catho-
lico Philippo, auunculo
tuo, scripsi, quòd res nouas
& varias contineat, belli-
cas & ciuiles, ac graues & inopinatos rerum
euentus, non solum profuturam, sed etiam sa-
tis delectaturam putauì. Continet enim mise-
rabilem Portugalensium regis Sebastiani necè
in Mauritania cum duorum regum Mauro-
rum interitu; & Henrici S. R. E. Cardina-
lis, qui post Sebastianum in Portugalia re-
gnauit, ad declarandum successorem suum
acta; tum eorum iura, qui in petitione regni
concurrerunt; deinde quorundam Portuga-
A 2 lensium

lensum motus cōtra Regem Catholicum Philippum, cuius in Portugaliā ius optimum esse iudicabatur; postremò victum profligatumq; Antonium, quem aliquot Portugallenses Philippi aduersarij regem creauerant. Nec de huius historia fide quicquam dubitandum cuiquam est, quā ita verē narrat omnia, ut nihil in ea falsum fictumq; sit omnium sententia, qui rebus ipsis interfuerunt. Debetur autem Serenissime Alberte tuo nomini huius historia dedicatio vel ob hanc maximē causam, quòd pro rege Philippo auunculo tuo ipsam Portugaliā summa cum prudentia & equitate regis, auunculo pariter et Portugallensibus charus: atq; ipsam expectationem superas, quam de tuo ingenio, & virtute conceperamus. Sed & mea fama consultum bene fuerit, si mei patrocinium pro tua benignitate susceperis.

IO. AN-

IO. ANTONII

VIPERANI

DE OBTEŢTA PORTVGALIA

A REGE CATHOLICO

PHILIPPO

HISTORIA.



PORTVGALIA est in extrema Hispania, quæ in Occidentem vergit, ac magnam Lusitaniæ partem continet, quæ est tertia pars totius Hispaniæ. Nam Hispania omnis in tres diuisa est partes: quarum vnā Bæticam, alteram Tarraconensem, tertiam Lusitaniam appellarunt. Quæ quidem à Tarraconensi, qua parte ad Septentriones erigitur, flumine Durio; à Bætica flumine Ana diuiditur, qua spectat in Orientem; cæterum ab occasu Solis & meridie Oceano cingitur. Est autem (vt Lusitanarum rerum scriptores prodiderunt) à portu oppidi Calis sic appellata Portugalia, quod M. circiter & D. pass. à litore distat, & Durio imminet, vbi in Oceanum influit. quippe ab eius portus celebritate

Ana vulgo Guadiana.

Cale hodie Portus.

ex

ex frequentia mercatorum vndiq; comœantium quod erat vnus loci proprium nomen in vniuersum regnum deriuatum est. Vnde idem regnum modò Portugalia, modò Lusitania nominatur. Hæc Gregorio XIII. Pont. Max. sub rege Sebastiano huius nominis primo, reliqua Hispania sub rege Catholico Philippo II. erat, Caroli V. Imp. F. Sed in prælio à Mauris interfecto Sebastiano, & Henrico S. R. E. Cardinale, qui post Sebastianum regnum obtinuit, vita functo, ad regem Philippum propinquitatis iure peruenit. Verùm operæpretium est priùs Sebastiani interitum, & Henrici acta breuiter enarrare, quàm explicem quo modo rex Philippus Portugaliã adeptus sit. Sebastianus iuuenis natura ferox, magna vi corporis, auidus imperij (quam cupiditatem præceptorum cohortationes, & assentatorum blanditiæ magis ac magis accenderant) ardebat animo vel in Indiam nauigare, vel in Africam se trajicere, vt nationes à Christianorum moribus & institutis alienas suæ ditioni subigeret. quibus in regionibus olim multæ vrbes à Portugalesibus parua manu, magna cum gloria captæ, & imperio Portugalesi adiunctæ sunt. Ac primò in Mauritaniã Tingitanã cum paucis transmisit, vt regionem, ac loca, & oppidorum situs perspiceret: nec multo post deinde à Mahomethe Marrochensium & Fessensium rege contra patrum suum Moluchum, à quo regnis spoliatus fuerat, rogatus auxilium ad bellum Mauritanicum toto pectore incubuit: ac contra Mahomethis sententiam

& vo-

& voluntatem arma contra Moluchū suscepit. Nam Mahomethes tantū auxilia contra Moluchū petebat, &, ne cum exercitu in Mauritaniam transiret, enixè regem Sebastianum orabat, vt ne quid Mauri de eius aduentu suspicarentur, quòd non ad ferendum auxilium, sed ad occupandam Mauritaniam veniret. qua Maurorum animis iniecta suspicione (porrò facilè credimus quæ timemus) nec qui secum essent, contra Moluchum pugnarent; nec qui cum Molucho, ad se vnquam transfugerent. Spem verò recuperandorum regnorum se non solū ab his, qui secum erant, sed etiam ab illis, qui Moluchum sequebantur, accepisse: quòd ad se transfugere constituisent, si defendendi sui vires aliquas habuisset. At Sebastianus bellum ipsemet contra Moluchum pro Mahomethe gerere voluit, ratus occasionem occupandi vniuersam Mauritaniam sibi tunc diuinitus oblatam: è qua Turcam excluderet, & religionem Christianam inferret, ac sibi Marrochenium Imperatoris nomen acquireret. Nec multa disputatione res in Portugalensium concilio agitata est, licet longa disputatione indigeret. quippe cū eius voluntatem obstinam viderent, maxima pars idem velle cum rege, ac sentire simulavit; pauci, quos regis, regniq; charitas mouebat, bellum dissuadere: quòd non parum metuendum esset de Maurorum vana fide, de regis Sebastiani iuuenili furore, de regni orbitate, si quis aduersus casus regi eueniret. Atque etiam rex Philippus ipsius Sebastiani auunculus, cui vnā è duabus suis filia-

filia-

*Aqua Lu
pie vulgò
Gnadalup
pe.*

filiabus in matrimonium dare cogitabat, ad ædem
S. Mariæ ad Aquas Lupias in Caſtella, vbi reges am-
bo conuenerant, vt de multis inter ſe rebus differe-
rent, plurimis rationibus illius animum ab hoc bel-
lo retrahere conatus eſt. Monebat ne bellum teme-
re ſuſciperet, quod eſt conſilio, non caſu gerendum;
neve infidis fidem vllam haberet. Mauros ingenio
eſſe mobili & infido, quibus pulchrum eſt fallere,
præſertim Chriſtianos, quos acerbè & penitus ode-
re: non iuriſiurandi religione tangi, non beneficio-
rum & amicitia memoria moueri, ſemper cum for-
tuna fidem mutare. eundem, quem nunc amicum
putat, mox ſibi hoſtem futurum: bellumq; totum
poſtremò in ſe vnum conuerſum iri. Reputaret ani-
mo ſibi cum paucis contra innumerabiles copias in
alienis ſedibus ſuo cum periculo pro alterius com-
modis pugnandum. Ne fortunam tentaret, & in di-
ſcrimen ſe, remq; ſuam inconſultè conijceret. Euen-
tus quidem belli incertos eſſe, ſed rarò voluntatibus
hominum reſpondere. Quòd ſi tandem in Mauri-
tania bellum facere deſtinaret, Larachem expu-
gnandam curaret, maritimum, & ad res multas op-
portunum oppidum: vnde piratas mauros & tur-
cas eiiceret, atque in Hiſpanias Afris tranſitum præ-
cideret. ſe ad hoc bellum ei cum L. triremibus V.
millia veteranorum militum Hiſpanorum miſſu-
rum. Nec verò tamen ipſe bello intereſſet, ſed ali-
cui ſtrenuo, & rei militaris ſcienti duci adminiſtran-
dum committeret: ipſe ſuo in regno remaneret,
iuuenis, relictus vnicus regni hæres, necdum vlla
ſuſcep-

*Larache
olim
Lixa.*

suscepta sobole, nec ducta vxore. Iisdem quoq;
 rationibus alij regis Philippi aulæ primarij, quos
 interdum Rex submittebat, vt idem confirmarent,
 ab huius belli cura Sebastianum reuocare moliri
 sunt. At frustra omnis oratio. Nam quamuis di-
 ceret se Larachem tantum armis oppugnaturum,
 tamen semper animo bellum contra Moluchum
 agitabat, vt aliqua illustri victoria se, nomenq; su-
 um nobilitaret. Sed neque Henricus S. R. E. Car-
 dinalis, patris patruus, neq; regina Catharina aua
 monendo, ac rogando ne bellum sumeret indi-
 gnum se, neq; necessarium, & importunum, iuue-
 nis, sine prole, ac belli neruis, quicquam eius ani-
 mum flexere: qui non tantum Mauritaniam, sed
 vniuersam Africam cogitatione inuaserat: & cui ab
 assentatoribus persuasum erat neminem posse ar-
 morum Portugalensium impetum sustinere, cæcus
 ad optatum bellum rapiebatur. Augebatq; spiritus
 Arzilla oppidum in Mauritania illi Moluchi odio
 ab Abdelcherino præfecto traditum. Ergo totus
 deinceps animo & opibus huic bello insistens, na-
 ues instrui, nautas & gubernatores conquiri, milites
 scribi, exercitum cogi, arma, tela, tormenta, &
 quæ ad bellum vsui forent comparari iussit. Om-
 nis nobilitas cum armis & equis regi præstò fuit.
 quandoquidem Portugalenses fideliter & amanter
 suum regem colunt. M. D. equites, pedites ad xv.
 M. coacti sunt: sed eorum maxima pars rudis &
 iners. Classis maiorum nauium onerariarum LX.
 triremium VII. præter alia diuersorum generum

*Gades
vulgò
Caliz.*

*Tingis
vulgò
Tanger.*

minora nauigia numero ferè Dccc. Igitur rebus omnibus ad profectiõem comparatis anno M.D. LXXVIII. ix. Kal. Iulij Olyſipone ſoluit, ac Gades tenuit. vbi à ſapientioribus viris tandem ſibi perſuaderi ſiuit Larachem ſolùm petere, non aliò exercitum ducere. Deinde hac mente hinc rectà in Mauritaniã traiecit, atque ad oppidum Tingim, quod in Portugalenſium poteſtate eſt, claſſem applicuit. quo in loco Mahomethes cum paucis Mauris illi præſtolabatur: ac ſecundam nauigationem gratulatus eſt, & de allatis auxilijs gratias egit; ſed rationem iuuandi ſe contra Moluchum reprehendit. Negabat enim regem ipſum in Mauritaniã venire oportuiſſe, quòd eius præſentia ſuorum bellandi ſtadium reſtinctura, & aliorum à ſe animos alienatura eſſet. quoniam Mauris omnibus à Chriſtianis metus eſt, ne tandem ſocietatis ſpecie decepti hoſtile aliquid patiantur. Quamobrem tantùm vt aliqua ſibi contra Moluchum auxilia daret poſtulauit. Cui rex Sebaſtianus reſpondit ſe nihil niſi de conſiderato & explorato conſilio feciſſe, atq; facturum. Tum mauris militibus Mahomethis iuſſis terreſtri itinere Arzillam ire (quod oppidum ab Abdelcherino regi Sebaſtiano traditum ſuprà memorauimus) ipſi reges occidentalem Africæ oram legentes eòdem claſſem appulerunt. At Moluchus, qui ingentem equitum & peditum numerum comparauerat, profectusq; Marochomontes, quos Sus vocant, circumierat, præſidia certis locis diſpoſuerat, quos ad defectionem ſpectare cognouerat

p. iac.

punierat, dubios confirmauerat, ac demum in Tasmena loco plano, & opportuno haud longè ab Alcaffare quibiro castra fecerat, post nunciatum sibi regis Sebastiani aduentum, & classis ad Arzillæ litus appulsum, Agmethem fratrem cū III. M. equitum & II. M. peditum Arzillam versùs misit hostium consilia exploratum. Verùm Sebastianus postquam Arzillam nauibus attigit, XX. M. pass. ab Arzilla Larachem terra petere constituit. Itaq; milites, arma, tela, tormenta in terram exponi, ac militibus in dies viij. cibaria distribui, & classis præfectum Larachem adnavigare iussit. Ergo Arzilla proficiscuntur, atque iter ad flumen Almechazem XXVII. M. pass. hinc dirigunt: quo transito Larachē flectant. Quam rem Moluchus ex transfugis & speculatoribus cognoscens, lætus castra contra hostem mouit: atq; ad Alcaffarem quibiro confedit. At Mahomethes, quem in via certiore per fugæ faciunt de maximo hostium numero, & de Moluchi mortifero morbo ex dato (vt suspicio erat) veneno, Sebastianum vehementer orat atq; obsecrat, ne longiùs progrediatur, quoad certum de Moluchi valetudine nuncium accipiant: cui grauissimè ægrotanti mors instare creditur. post eius mortem Mauritaniæ principes ad se illico transituros. Sic bellum ex voto sine prælio & vulnere confectum iri. Sed rerum necessariorum penuria & Sebastiani feruor animi nullam moram sustinent. Iam ad flumen Almechazem peruenerant, quod per apertum campum Alcaffaris quibiro fuit X. M. pass.

hinc Alcaſſare quibiro: nec toto itinere Maurus vltus uſquam viſus fuerat. quæ res prudentioribus viris à callido & potente hoſte metum iniecit: quòd fluminis tranſitum Chriſtianis liberum reliquiſſet, vt poſt tranſitum ſeſe illis in patente campo cum maximis copijs oſtenderet, atque ad neceſſarium certamen pertraheret. Nec res aliter euenit. Nam vt Sebaſtianus flumen tranſmiſit, & in planitiem euasiſt, ac III. m. paſſ. à flumine progreſſus eſt, hoſtes vndiq; aduolare conſpecti ſunt. quorum aſpectus rerum bellicarum inſolitos non mediocri metu affecit. Et quamuis pugnae conditio iniqua eſſet in patente omni ex parte campo paucos pedites cū magna equitum multitudine congregati, tamen cibariorum inopia, quæ iam conſumpta erant, & hoſtium propinquitas, quæ nullum facilem Portugaleſibus receptum dabat, ad pugnandum eos coſegabat. Atque etiam Sebaſtianus turpe exiſtimans detrectare certamen, aciem inſtrui, & in hoſtem dirigi iuſſit. Et Moluchus propiùs accedens acie in orbem medium inſtructa, è lectica, qua decumbens vehebatur, in equum imponi ſe voluit, vt hoſtilem exercitum cerneret. quem procul à flumine in lata planitie conſpiciens, conuerſis ad ſuos oculis, Vicistiſt, inquit. plures contra pauciores, loco etiam vobis æquiore pugnabitis. Nolite pati tam præclaram victoriam vobis è manibus elabi. Signum igitur pugnae vtrinque datur: ac primo congreſſu pulſus Maurus: ſed mox omnis equitum & peditum à tergo & lateribus circumfuſa multitudo

exerci-

exercitum Portugalensem breui vndiq; circumuenit, permultos cecidit: reliquos victos cepit, suorum paucis desideratis pridie Non. Augusti. Ipsos quoque reges alium alius casus oppressit. Sebastianus in acie fortiter dimicando mortem occubuit: Mahomethes in fuga errore vadi merfus in flumen Alnechazem interijt: Moluchum in ipso pugnae initio in lectica morbus extinxit. quorum calamitatem ardens cometa prænunciauerat. Sic Portugalensium regis Sebastiani iuuenilis ardor ex inscientia & audacia miserabilem casum inuenit. qui alioquin si ingentem illum suum spiritum doctrina & ratione rexisset, ob egregias animi corporisq; dotes profectò vir amplissimus ac clarissimus euasisset. Ad huius cladis nuncium magnus mœror vniuersam Portugaliam inuasit. Dolebant regis necem, regni vires afflictas, nobilitatem amissam, Lusitanæ virtutis gloriã nescio quid obscuratam. Cognitumq; est sapienter & verè dictum esse, Væ regno, cuius rex puer est. Post regis Sebastiani interitum Henricus S. R. E. Cardinalis, quòd solus de virili Portugalensium regum legitima sobole superesset, comuni omnium ordinum consensu regni gubernacula prehendit. Tunc Rex Catholicus Philippus II. in Portugaliam legauit Christophorum Moram nobilem Olyssiponensem, domesticum suum, cuius fidei & prudentiæ fidebat, vt regem Henricum, & Portugalensium primarios de suo in Portugalix regnum post ipsius Henrici mortē iure doceret: quoniam filius sororis Henrici natu maximæ, ac mas esset

esset, atq; omnes, qui ius aliquod in idem regnũ haberent, ætate præiret. Quã legationẽ Christophorus egregiè obiit. Cũ autem Henricus infirma valetudine, & ætate prouectum se videret, veritus ne si vita decederet non declarato suo successore, variæ nobilium dissensiones, & graues populi motus fierent, hanc cogitationem suscepit, vt eorum, qui ius aliquod in Portugalix regnum habere censerentur, rationes dispiceret: atque illum deinde renunciaret Portugalensium regem, ad quem regni successionem iure pertinere cognouerit. Ac grauitè tulit, quòd Antonius Ludouici fratris sui filius spurius, natus ex concubina obscuris orta parentibus, iudæis, vilium rerum venditoribus, nuper ad Ecclesiam Christianam admissis, atque olim in sacrum Ecclesiæ Diaconorum ordinem receptus, postea miles Hierosolymitanus factus, quanquã à Pontifice maximo his legibus, quæ spurium initiari, & initiatum fieri militem vetant, absolutus, regnum petere auderet, asserens matris suæ nuptias legitimas fuisse. Diuq; dubius fuit vtum illi iudicium concederet, an non. Nam actionem dare, quam leges adimunt prohibentes spurios in regni hæreditatem vocari, istud erat plures lites ferere: at si non dedisset, quia maximè popularis esset, timebat ne multa misceret atque turbaret. Tandem ad dandam illi actionem inclinauit, atque in iudicium admittendum duxit, è quo planè excludendum intelligebat, quoniam facile spurius esse conuinceretur: vt malè exiens iniquitatem suæ causæ doleret, non alterius iniuriam querere.

quereretur; & illius fautores in errorem inductos se esse perciperent; sibi autem deinceps iure liceret & Antonij, & studioforū eius insolentiam & contumaciam vindicare. Ac Gregorium XIII. Pontificem maximum rogauit, vt causam de nuptijs matris Antonij, cuius iudicium ad sedem Apostolicam spectaret, in Portugalia agi sineret, atque ijs iudicibus, quos ipsemet Pontifex voluisset, iudicandam permetteret: quia plurimū interesset ad communem Portugalie tranquillitatem maturē, qui post se regnet, ante suum obitum declarari; cū senex, & valetudinarius sit, multaq; à factiosis hominibus contra reipub. struantur. nec verò ante cognitam causam de nuptijs matris Antonij regem denunciandum. Cui postulationi Pontifex benignè concessit: ipsumq; Henricum causæ iudicem præposuit. Henricus igitur de regni successione iudicium constituit, & eos, qui actionem aliquam petendi regnum habere putabantur, citauit, vt ad statum diem adessent: ac pro se quisque experiretur. nominatimq; citauit regem Catholicum Philippum, Emanuelem Philibertum Ducem Allobrogum, Catharinā Ioannis Ducis Brigantini vxorem, Rainutium Farnesium filium Mariæ sororis Catharinæ, & Antonium Ludouici fratris sui filium. Sed istorum inter se, & cum rege Henrico affinitatum vincula explicanda sunt, quò cuncta melius cognoscantur. Portugalsium rex Emanuel, cuius egregia virtus fuit, & nomen toto orbe terrarum illustre, ex Maria Ferdinandi Aragonensium regis & Isabellæ Castellanoꝝ reginæ

reginæ coniugum filia IX. liberos ſuſcepit, Ioannem, Iſabellam, Beatricem, Ludouicum, Ferdinandum, Alſonſum, Henricum, Odoardum, Antonium. Ioannes omnium primus poſt patrem regnauit huius nominis tertius: atque ex Catharina Caroli V. Imp. ſore ſilium habuit nomine Ioannem. Is uiuo patre obiit, atque vnicum ſilium Sebaſtianum ex Ioanna Caroli V. Imp. filia reliquit, quem iuuenem à Mauris interfectum in prælio ſuprà demonſtrauimus. Iſabella Carolo V. Imp. nupſit: cuius ſatu editus eſt rex Philippus. Beatrix coniuncta in matrimonio Carolo Philiberto Duci Allobrogum Emanuelem genuit. Ludouicus ex concubina Antonium procreauit. Ex Odoardo Maria, quæ Alexandro Farnefio Octauij Ducis Parmenſis F. nupta Rainutium peperit, & Catharina Ducis Brigantini vxor nata eſt. Ferdinandus ſinè liberis obiit: Antonius migrauit infans è vita: Alſonſus & Henricus in S. R. E. Cardinalium collegium cooptati ſacris initiati ſunt; ſed alter è vita exceſſerat, alter ſolus è filijs regis Emanuelis ſuperſtes in regis Sebaſtiani demortui locum ſucceſſit. Quapropter cum Henrico deuincti cognationibus & affinitatibus erāt rex Catholicus Philippus ex Iſabella, Emanuel Philibertus ex Beatrice, Antonius ex Ludouico, Rainutius ex Maria Odoardi filia, Catharina ex eodem Odoardo prognata: quorum parentes iam hanc vitam deſeruerant, ipſi in petitione regni concurre-
runt. Dux Brigantinus & Antonius ante regē Henricum Olyſipone omnium Portugalenſium vrbiū
principe

principe in iudicio adfuerunt, alter Catharinæ vxoris suæ ius defendens, alter suam per se ipse causam agens. At Rainutius Farnesius Ferdinandum Farnesium Episcopum Parmensem pro se cognitorem allegauit. Emanuel Philibertus licet regis Philippi ius suo melius esse sciret, tamen quia ius suum cæterorum iuribus potius esse intelligebat, vt de successione quæstio omni ex parte ageretur, atque omnis dubitandi ratio tolleretur, Carolum à Ruuere iuris sui vicarium misit. Rex Philippus Petrū Gyronium ducem Osunæ potentem & honoratum principem legauit cum Christophoro Mora (quem etiā ante solum statim post regis Sebastiani mortem legauerat) duobusq; delectis iurisperitis Roderico Valschio ab Arce & Ludouico Molina. Interim quoq; rex Henricus totius regni concilium cōuocauit: in quo ordinibus edixit, quoniam de successione in regnum controuersia longiorem disputationem postularet, ipse verò grandis natu, & ægra valetudine esset, vt l. IX. ex omnibus nobiles viros legerent in Lusitanis prudentia & dignitate præstantes: è quibus ipse V. seligeret; qui, si diem obire sibi contigisset ante litem regni dijudicatam, ipsi regnum communi consilio & autoritate gubernarent, donec iudicatum de successione esset. Insuper XXIV. iurisperitorum delectum haberent doctrina & probitate excellentium, è quorum numero ipse XI. exciperet, qui de regni successione cognoscerent, ac iudicarent: eorumq; sententijs cui

C regnum

*Osuna nō
nullis Au
sunia.*

regnum adiudicatum foret, traderetur. Gubernatorum verò & iudicum nomina secreta dum viveret apud se habiturum, ne cui fas sit corruptelam aliquam iudicij moliri. Præterea voluit omnes ordines, & ducem Brigantinum pro Catharina vxore, & Antonium iurare gubernatorum ac iudicum sententijs & decretis se planè semper obtemperaturos. Quæ Portugalensibus non ingrata fuere, quòd sperarent hac via regnum non nisi alicui Portugaliensi principi adiudicatum iri: quamuis aliqui nullam omnino rationem externorum haberi maluissent. Igitur causa agitur: & quisque ius defendit, cuius est cognitor. Atverò Catharina Henrici III. Gallorum regis mater etsi ad idem iudicium vocata non fuerat, tamè Urbanum à sancto. Gelasio Episcopum Comingensem misit, qui Portugalensium regi ius exponeret, quod ipsa in Portugalix regnum haberet. Referebat Alphonsum huius nominis tertium Portugalensium regem, fratrem Sancij, cui Capeli cognomen fuit, antequàm regnum obtinuisset, habuisse in Gallia vxorem Matildam, ex eaque filium suscepisse Rodulfum dominum Bononiæ in Gallia oppidi: deinde post obtentum regnum vxorem duxisse Beatricem filiam Alfonsi XI. regis Castellæ, atque ex ea Dionysium genuisse. Quare Portugaliam ad Rodulfum ex priorè coniugio natum obuenire debuisse, non ad Dionysium ex vxore secunda procreatum: eademque ratione ad Rodulfi potiùs, quàm ad Dionysij nepotes pertinere. Regnam Catharinam à Rodulfi nepotibus mater-

num

*Bononiæ
olim
Gessoniæ
civit.*

num genus ducere. Qua oratione non modò regnū poscebat, verū etiam ipsum regem Henricum, & quotquot ab Alfonso reges fuere, malè captæ Portugalix hæreditatis accusabat. Vnde quoniam par non erat stultam legationem censere, à quibusdam existimatum est Episcopum Comingensem specie quidem petendæ Portugalix hæreditatis, sed re vera missum, vt cum Portugalensibus secretò aliquid contra regem Philippum ageret. quem Galli, qui cum Hispanis continuas simultates exercent, videbant omnium Christianorum regum, quotquot vnquam fuere, ex Portugalix possessione potentissimum fore. Quod Catharinæ ius, quia nullum omnino erat, quoniam ex rerum Portugalensium, Gallicarum, & Belgicarum monumentis constaret Alfonso nullos ex Matilda liberos suscepisse; & Robertum, qui post obitum Matildæ Comitatum Bononiæ obtinuit, non ex Matilda, sed ex Matildæ sorore Alida Claramontis & Aruerniæ Comitis vxore natum fuisse, ab omnibus neglectum est: mens tamen, & voluntas à quibusdam probata. Et Antonius iussus matris suæ nuptias legitimas ostendere quatuor testes dedit, duos è nouis, materteram inquam suam, & materteræ maritum, duos è veteribus Christianis ortos; quos subornauerat, vt rogati de matris suæ nuptijs dicerent legitimas fuisse, seq; ipsis interfuisse. Qui ortum è veteribus Christianis ducunt, conscientia conuicti falsi sunt se quidem ab Antonio instructos fuisse, vt affirmarent eius matrē Ludouico patri legitimè nupsisse, re vera

tamen se nihil de hoc matrimonio scire. At matertera maritus & matertera testificati sunt verum & legitimum connubium fuisse, seq; ipsis nuptijs interfuisse. Verum minutatim de loco, tempore, & his, quæ factum circumstant, interrogati cum inter se dissentirent, neq; eorum constaret oratio, rex Henricus ipsos tanquam aperte fictos falsosq; testes in carcerem conijci, & debitis supplicijs affici iussit: ipsumq; Antonium sedens iudex cum IV. Episcopis, totidemq; iurisperitis, quos ad cognoscendam secum causam adiunxerat, pronunciauit spurium esse non modò omnium opinione semper ita habitum, sed etiam à Ludouico patre voce, ac scripto sæpe; ac demum testamento renunciatū: sua quoq; confessione conuictum, quòd olim à Iulio III. Pontif. max. quibusdam legibus, quæ cōtra spurios sunt, absolui postulauerit; absolutusq; sit. Nec multà à lata sententia dies intercessere, cum à prioribus alteræ Gregorij XIII. Pontificis Maximi litteræ vel Antonij rogatu, quòd alios, quàm Portugalenses iudices appellasset, vel Alexandri Frumenti in Portugalia Nuncij Apostolici opera, qui cum Antonio magis facere, quàm cum rege Philippo existinabatur, regi Henrico redditæ sunt: quibus Pontifex maximus priores suas litteras interpretatus, quòd in illis Antonij causam agi tantum in Portugalia, non etiam iudicari sensisset, aperte iubebat ne in Portugalia iudicaretur, sed iudicanda Romam ad se transmitteretur. Quod rex Henricus satis acerbè accepit: questusq; his litteris

non

non modò authoritatem suam immeritò cōtemni,
& integritatem in tam aperta causa violari, sed etiā
dissensiones ciuiles ali, & reipub. Portugalesi ex
uarijs motibus occasum afferri, asperius,quàm eius
mores ferebant, Pontifici rescripsit. Atque illum
hoc etiam malè habuit, quòd sensit Romæ per no-
uos Christianos, quorum ortus à Iudæis est, agi, vt
de Antonij causa iudicium, cuius maternum genus
ex iudeorum stirpe profectum esse sciunt, prolate-
tur: quoniam in magna spe habent ipsum aliquan-
do ab omnibus regem creandum, si nullus denun-
ciatus rex sit. Cùm verò intelligeret Antonium cō-
tra iurandum, quo iurauerat se re iudicata statu-
rum, ac nihil contra moliturum, multa mouere, ac
modò plebem, modò ciuitatum & Dynastarum
procuratores ambire, hortari, rogare, multaq; illis
polliceri, vt se regem creent, quòd regis creatio ad
ipsum pertineat, iussit illum ex vrbe Olyssipone, to-
toq; vrbis agro intra certum diem excedere: edi-
xitq;, ne posthàc Olyssiponem reuerteretur, com-
minatus illi, ni paruerit, pœnam, quæ contra non
obedientes regis imperio, & contra perturbantes
regni pacem & tranquillitatem constituta est. Pa-
ruit edicto regis Antonius: sed mox acrius stimulā-
te animum regnandi cupiditate Olyssiponem re-
dijt; eademq; mouere cœpit. Quod sentiens rex
Henricus illum vt reum citat; atq; adesse negligen-
tem bonis omnibus spoliatur; & ni è finibus regni ex-
cedat, pœnam cōstituit, quæ de lædentibus regiam
maiestatem sumitur. Graues quoq; pœnas contra
eos

cos ſancit, qui Antonium teſto exceperint, aut re aliqua iuuerint, vel eius rebus vſlo modo fauerint. Poſt quæ Antonius procul à conſpectu regis Henrici latuit. At verò regis Philippi procuratores, quibus rex præceperat ſuo nomine regē Henricū orare, vt ius ſuum benè perſpiceret, atq; vbi perſpexiſſet optimum eſſe, non dubitaret ſe regni ſucceſſorem Portugalenſibus denunciare, ſic de regis ſui iure apud regem Henricum diſceptant.

In regnum non morientis teſtamento, ſed propinquitatis iure ſuccedi. Regnum enim ei, quem vnum ex omnibus delectum ciuitatis principem, & reipub. moderatorem conſtituerunt ad tollenda ciuium diſidia, quæ in noua regis creatione ex dominandi libidine ſemper enaſcerētur, hac conditione delatum à populo, vt in demortui regis locum qui propinquitatis vinculis coniunctiſſimus illi eſſet, ex legitimis natus nuptijs, ſuccederet. Quòd ſi plures eundem propinquitatis gradum tenerent, mas ſcæminæ, & maior natu minori præponeretur. Proinde regnum eſſe non demortui, ſed generis hæreditatem, eandemq; indiuiduam, ac iure ſanguinis ad eundam: quæ non ad eum, quem rex moriens voluerit, ſed quem illi ſanguinis cognitione proxima natura fecerit, venit. Ipli regi Henrico regem Philippum omnium, qui Portugaliam ſucceſſionis nomine petūt, neceſſitudine proximum eſſe: interiore quidem Philiberto, non modò quia mater eius Iſabella ſemper auguſta Beatricem Philiberti matrem ætate anteuerit, ſed quia
ipſe

ipse rex Philippus Philiberto grandior natu sit; Catharina verò, quòd eam sexus nobilitate, & ætatis authoritate antecedit; at Rainutio, & quia maior ætate, & quia vno propinquitatis gradu propior. Nec magni momenti esse quod à Catharina afferatur, à se patrem suum Odoardum repræsentari: qui si viueret, ipsi Henrico succederet. Nam in huius regni successionē nullus nunc est fratrum filijs cum patruis concursus, inter quos repræsentationis ratio haberi solet. quoniam hi, qui regnum petunt, omnes consobrini sunt, regis Henrici fratrum, ac fororum filij: quorum personas spectare oportet, non parentum, quashic referre non possunt. Id quod etiam antiquissimis legibus à Gothorum temporibus semper in Hispania seruatum est. Quin etiam si daretur posse parentes referri, certè Maria, si in viuīs esset, & Catharina Odoardi filix sexum virilem patris nullo modo possent repræsentare. Non enim ius naturæ patitur, nec iuris rationes, quæ naturæ vim imitantur, volunt, vt quæ re vera est fœmina, repræsentationis iure pro mare habeatur. Quare patrem filia non in sexu, sed in gradu repræsentabit. Proinde licet ipsarum pater Odoardus Isabellæ regis Philippi matri honore sexus anteponeretur, non tamen ipsius Odoardi filix regi Philippo itidem anteponerentur, quæ ex fœminis mares fieri nequeunt. Quòd si nullum ius repræsentationis est Mariæ, nec à Maria quidem in Rainutium filium transfundi vllum poterit. Quamobrè Portugaliæ successionē regi Philippo iure

iure optimo deberi, quòd còpetitores omnes a-
 te, insuper alium sexu, alium vincat propinqua-
 te. Quinimmo leges ipsæ Portugalenses hoc ipsum
 statuunt, vt in istis successioneibus mas fœminæ, &
 mas natu maior cæteris omnibus præferatur. De
 Antonio se nihil velle dicere; quando leges omnes
 & instituta prohibent spurios non modò regnorum
 possessionem, sed ne aliorum quidem bonorū hæ-
 reditatem vllam ab intestato adire. Illum verò esse
 spurium ipsi Henrico magis notum atque testatum
 esse, quàm alijs. qui hoc ipsum à fratre suo Ludouico
 sæpe audierit: à quo rogatum Põtificem maximum
 etiam sciat, vt ijs legibus filium suum Antonium
 solueret, quæ prohibent spurium sacris initiari, di-
 gnitates ecclesiasticas obtinere, in testamentis hære-
 dem nominari. Nec valere Ioannis huius nominis
 primi Portugalix regis exemplum, quòd spurius
 fuerit. Non enim iure sanguinis regnum obtinuit,
 sed à populo rex creatus est, cùm è regia stirpe ne-
 mo superstes esset non spurius, qui Ferdinando mor-
 tuo iure posset succedere. siquidem eius filia Beatrix
 spuria esse credebatur. At nunc regis Henrici cogna-
 tos extare, ad quos regni hæreditas iure pertineat.
 Hæc, atque huiusmodi alia regis Philippi ministri
 de regis sui iure dicunt: eaque tum argumentis du-
 ctis ex naturæ initijs, & ex legum autoritatibus,
 tum præstantissimorum iurisperitorum sententijs
 confirmant. Quamobrem Henricum orant, vt quā-
 do regis Philippi causam omnium excellentissimo-
 rum iurisperitorum non solùm Castellanorum, sed
 etiam

etiam Portugalensium, & Italarum, arque aliarum nationum iudicio sine vlla dubitatione optimam & æquissimam esse videt, atq; ad cæterorum regnorum suorum incolumitatem, & totius reip. Christianæ tranquillitatem maximè referre, ipsius regis Catholici ius rectè, atq; extra iudicium perspiciat: & quod certum est in controuersiam non adducat: neve regem ab omni foro & iudicio liberum iurisconsultorum sententijs subijciat, & eorum, quorum animi faciliè possunt odio & amore permoueri. His ipsis argumentis, quæ à regis Catholici ministris afferebantur, vtens Carolus à Ruuere fatetur Emanuelem Philibertum in hac regni petitione à rege Philippo vinci, quòd eo sit minor ætate, sed Catharinæ & Rainutio præferendū, quòd illam sexu, hunc antecedit propinquitate. At Dux Brigantinus contra regem Philippum & Emanuelē Philibertum pro Catharina repræsentationem, contra Rainutium propinquitatem vsurpat. Ferdinandus Farnesius verò repræsentationem contra regem Philippum & Emanuelem Philibertum pro Rainutio, sexum contra Catharinam proponit. Sic in excellentissimorum iurisperitorum concilio regis Henrici iussu habito quæ à quoque dicebantur magno cum studio agitata; & de singulorum actionibus disputatum diu & permultum est. Ob quas concertationes rex Henricus, qui Portugalensibus natiuum regem esse cupiebat, & suo iure priuare quempiam nolebat, à multis persuasus est publicæ tranquillitatis causa, vir alio-

quin summæ castitatis & sanctitatis , vxorem ducere , si quos liberos susciperet, vnde omnem controuersiam tolleret. Quoniam verò oportebat absolui à Pontifice maximo lege , qua: veritum est sacris initiato vxorem habere , huius rei gratia constituit Odoardum Castroblancum nobilem Olyssiponensem ad Pontificem Romam mittere . verum interea in febrim incidit : è qua cùm minimè recrearetur , sed continuata motiuncula in dies extabesceret, à nuptiarum cogitatione destitit , atque animum ad declarandum successorē suum aduertit. Postremò cùm regis Philippi causam optimam esse cognosceret , à qua starent peritissimi legum , atq; animaduerneret Portugaleses à Castellanis alienos imperium regis Philippi non satis æquis animis accepturos , optimum factu iudicauit , vt regis Philippi actioni & Portugalesium voluntatibus vtilitatibusque consuleret, regnū , quod alioquin iure deberetur , certis quibusdam pactionibus illi tradere , quæ Portugalesium commoda respuerent. Et quidem rex Philippus ad omnem æquā pactionem veniebat , vt Portugalesium animos conciliaret, ac quietè regnum obtineret, & bellum contra Christianos & sui generis homines effugeret. Præstat enim de suo iure interdum aliquid remittere , quàm totum violenter velle retinere . Verum Procuratores ciuitatum postquàm hoc consilium regis Henrici olfacere incœperunt , vt illi obuiam irent, quæsiuere an extincta regia virili & legitima prole sibi liceret quē vellent regem creare .

Quibus.

Quibus responsum est nō licere; quia regnum hæreditarium foret, non in populi arbitrio & potestate situm, partim dotale, partim armis partum. Interea pestilentia Olyssiponem incēssit, malum dirum & miserabile, omnibus commune, corporum contactu serpens. Quamobrem vitandæ contagionis causa in cœnobium S. Benedicti, quod vetus appellant, in suburbio secedit. vbi Christophorum Moram ad se accersit. ait velle se certis pactationibus regnum Philippo tradere: rogatq; an ius vllum procuratorium in hac re habeat. ille ius, quod habet, profert. quod quia inualidum videtur, aliud à rege Philippo mitti postulat. quod mox missum est. Scēuiente autem quotidie magis pestilentia ex Olyssipones suburbio, mense Octobri, anno M. D. LXXIX. Almerinum proficiscitur, vt rebus regni meliùs illic consulat: ibiq; totius regni concilium indicit. Almerinum est pagus è regione Santarenæ (quod oppidum veteres Scalabiim nominarunt) inter quæ flumen Tagus fluit XL.m.pas. supra Olyssiponem. Locus planus & patens, à dextra & sinistra collibus latè cinctus, frugum ferax, venatione amœnus, hyeme saluber, regijs ædibus nobilis: vbi Portugalensium reges hyberno tempore propter aëris temperationem vitam degere consueuerunt. Postquàm Almerinum peruenit, cum Osunorum Duce & Christophoro Mora de pactationibus agere, quibus Portugalia regi Philippo tradatur. At rex Philippus sibi persuadens ob Portugalensium vetus in Castellanos odium sibi ius suum

armis aliquando repetendum fore , ac doctus à facrarum rerum peritis licere sibi absque crimine bello persequi ius , quod iniuste sibi eripitur , quia Rex ex se iuste bello vindicare illatam iniuriam potest , quoniam superiorem iudicem non habet , qui damnum æstimet , lucroq; compenſet , quæ ad bellum pertinerent comparari constituit . In Hispania multas peditum & equitum leuis , ac grauis armaturæ copias cogi ; Italos & Germanos conducere ; ex Sicilia ; Neapoli , Mediolano Hispanorum præſidiorum partem accersiri ; arma , tormenta , commeatum vndiq; conuehi ; magnam insuper classem nauium & triremium instrui , eo consilio , vt si rex Henricus è vita cessisset , & Portugalenses regnum ex æquo & bono dare sibi nolissent , ipsum armis peteret : sin aut Henricus in vita diutius fuisset , aut Portugalenses spontè sibi regnum dedissent , arma in religionis Christianæ hostes transferret ; vel rem aliquam aliâ subiectis sibi populis gratam , quam fortuna , vel tempus suassisset , efficeret . Cæterum rex Henricus Almerini , vbi Antistites , Reguli , & ciuitatum Procuratores in indictum concilium ex regni more conuenerant , intentus Portugaliæ regi Philippo certis conditionibus tradere , vt ad illas facilius Portugalenses induceret , per Antonium Pineirum Episcopum Leriensem eos prius edocuit regni successionem omnium sapientum iudicio duos potissimè spectare , videlicet regem Philippum & Catharinam Ducis Brigantini uxorem : sed eorum vtrum magis spectet satis anceps & dubium adhuc esse . Verum
 si pro

si pro vtroque sententia feratur , magna vniuersæ
Portugalix pericula procreanda. Proinde videri si-
bi satius esse regnum quibusdam æquis conditio-
nibus regi Philippo tradi , si ante ipsum sobrinū su-
um mori sibi contigerit . Sic enim belli damna vita-
ri, & reip. *Portugalesi* optimè prouideri . Deinde
accipiens quòd procuratores ciuitatum intellige-
rent mandatum esse dumtaxat de concordia inter
regem Philippum & Catharinam agi , rursus per
eundem *Pineirum* eos edocuit de pactionibus esse
tantummodò inter regem Philippum & *Portugalē-*
ses agendum : illud verò quod de successionis iure
regis Philippi & Catharinæ in priore legatione dictū
est, ea ratione dictum fuisse , vt significaretur insta-
re diem, quo secundum regem Philippum sententia
feratur . Ideoq; se eos monere , ac magis magisque
suadere, vt vltro regi Philippo certis, & vtilibus cō-
ditionibus regnū concordissimè dedant. Eodē quoq;
tempore Catharinā per Paulū Alfonsum iurisperitū,
cuius opera multum utebatur, hortatus est ad faciē-
dam spontè, ad quam publicæ tranquillitatis causa
compelli poterat, cum rege Philippo & se dignam,
& suis rebus vtilem pactionem ; quòd ab illo boni-
tate causæ, ab Antonio gratia apud populum vin-
ceretur. daturum se operam , vt inter eos conue-
niat. Quinetiam eodem die, quo animam exha-
lavit, per tres regni ministros hortatus est ciuitatis
Olyssiponenfis Procuratores, vt aliarum ciuitatum
Procuratoribus persuaderent de pactionibus agere ,
quibus regnum Philippo cum pace tradant . Sed
Catha:

Catharina de pactione nihil audire vult: & Procuratores, licet ad pactiones Antistites & Reguli veniant, quò magis probari regis Philippi causam audiunt, eò magis de suo iure instant, asserentes neminem debere sanguinis iure succedere, sed à Portugalesi populo Portugalesium regem esse creandum: contenduntq; vt Henricus hoc ius populo esse pronunciet. Ad quorum rationem cum certa regis denuntiatio retardaretur, ministri regis Philippi regẽ Henricum etiam atque etiam hortari, ne ob plebem modo vllò cunctaretur successorem suum ad præscriptam regni formulam renunciare. Proinde rex Henricus & à regis Catholici ministris, & à regni cura stimulatus volens omnino regem Philippum ante extremum vitæ suæ diem Portugaliæ regem in concilio denunciare, ac motu aliquem populi grauiorem timens, armatorum hominum manum ex vicinis agris contraxit, recusans copias, quas illi rex Philippus offerebat, vt earum præsidio tectus & suam dignitatem retineret, & de regni successione liberius iudicaret. Tunc ciuitatum Procuratores de creando rege quæstionem repetierunt, sperantes hoc interim spacio regem Henricum nulla facta regis ex certa formula denunciatione vi morbi consumptum occasurum: factã verò per Pincirũ denunciationem irritam fore. Quibus biduum ad id denuo inquirendum datum est, cõtra nitentibus regis Philippi ministris: quòd istud erat moras trahere. omnem autem cunctationem procreare multa incommoda, & pericula posse. Interim nulla
alia

alia, quàm per Pineirum facta denunciatione, rex Henricus annis, curisq; cōfectus obiit pridie Kalend. Februarij, Ann. M. D. LXXX. ætatis. verò suæ L XIX. Eo mortuo Gubernatores, quorum nomina paulò ante suum obitum diuulgauerat, regni gubernationem susceperunt, Georgius Almeida Archiepiscopus Olyssiponensis, Ioannes Mascharenias, Franciscus Saa, Ioannes Telius, Didacus Lopus Sosa. Antonius, qui Scalabi latebat, confestim Olyssiponem ad tentandos multitudinis animos aduolauit: atq; à Senatu contendit, vt ius suum in regnum cognosceret. Qui ex consilio præsertim Fernandi Pinæ magnæ authoritatis Senatoris respondit nullum experiundi iuris apud se locum esse, sed Gubernatorum sententijs & decretis obtemperandum, perinde vt iurati sunt sese facturos. atq; illi minimè conquescenti, sed multa in temp. molienti deinde edixit, vt ex vrbe excederet; alioquin se alia via reip. pro suo munere consulturum. Quare commotus Antonius amicorum concilium conuocauit: in quo variæ sententiæ dictæ sunt. tandem in eam sententiam iuit, qua commonebatur ne quid contra Senatus consultum & Gubernatorū authoritatem faceret, vnde in se aliquā inuidiā concitaret. Itaq; vrbe egressus est, atque ad Bethlem templū nascenti Christo dicatum iuxta litus Tagi III. M. pass. Olyssipone distans, fluminis ostio propius, quasi patruo parentaturus abiit: ac mox illinc Scalabim redijt, imperans vni ex suis famulis, quem maximè audacem & fidum sibi cognouerat, vt Fernandum

nandum Pinam interficeret. Ille Fernandum obseruat, & obtruncat: comprehensus indicium proficitur: factusq; Senatoris necis reus omnium Gubernatorum regni Sententia suspendio damnatur. Cæterum significans Antonius velle se Gubernatorum decretis parere, quoniam his ipsis diebus tertiæ Põtificis maximi litteræ ab Alexandro Frumento Georgio Almeida redditæ erant, quibus causæ de matris suæ nuptijs, sublati alijs, ipsi Alexāder & Georgius iudices constituebantur, institit vt constituti à Põtifice maximo iudices de sua causa cognoscerent, ac iudicaret. Dux Osunorum & Christophorus Mora cæteriq; regis Philippi Legati singulis regni ordinibus regis sui litteras dederunt, & pro litterarum sententia postularunt, vt regnum spontè regi suo traderent, ad quem optimo iure peruenerit. Quo de iure dixerunt Rodericum Vaschiũ ante ipsos planius disputaturum. Tum Vaschius, Rex Philippus, quippe princeps absolutæ politiæ, nullius sententiæ obnoxius est; sed ius suum ex se exequi potest, quod omnes legum periti optimum esse docet, cum iudex nullus sit, cuius sententiæ stari debeat. Neq; enim Portugalenses possunt ea de re iudicare, de qua simul experiuntur. Nam asserunt regnum nulli iure successionis deferri debere, sed populo creandi regem ius esse. Nullum autem naturale, & ciuile ius patitur quempiam de suamet causa iudicare. Quinetiam rex Henricus, cui soli de successore iudicare fas erat, ipsi Philippo, cuius causam optimam esse perspexerat, regnum adiudicauit: suasitq;

suasitq; Catharinæ, & Portugalensibus cum illo pactionem aliquam facere. Adhæc neque regi Philippo, neque ipsis Portugalensibus conuenit sententiam vllam expectari. Nam dum tempus necessariò dicendis sententijs & de nuptijs matris Antonij, & de populi authoritate, & de competitorum iuribus longissimè protrahitur, regis Philippi rebus periculum procreatur, & Portugalia sumptibus exhauritur, atque externorum hominum, qui aduocantur, moribus & doctrinis inficitur. Cæterùm in potentissimi, iustissimi, ac sanctissimi regis ditione res Portugalensis amplissima & firmissima erit. Quamobrè si æquitatè, ac regis Henrici voluntatè sequentes regi Philippo debitum regnum ultro derulerint, sibi ipsis optimè consulent. Hæc eadem quoq; Vaschius Olyssipone magistratibus copiosè disertèq; disseruit. Cuius orationem aliqui probarunt; quidam ad respondendum spacium petierunt. Gubernatores autem responderunt optare se quidè regi Philippo, sed minimè posse regnum absq; certorum iudicum sententijs cuiquam deferre. Nec tamen, cùm iurisperitos consuluissent an ius procuratorium à ciuitatibus datum ijs, quos in regni concilium ad regem Henricum misissent, adhuc ratum foret, & responsum esset non ampliùs valere, quòd ad regem Henricum, non ad Gubernatores missi essent, sed ad nouos conuentus agendos nouo iure procuratorio opus esse, nouum concilium indixere: nec constitutorum à rege Henrico iudicum nomina in apertum retulere, quòd priùs de nuptijs

E matris

matris Antonij, & de populi authoritate, quàm de competitorum iuribus agendum dicerent. Instant nihilominus regis Philippi ministri monendo, suadendo, pollicendo regnum poscere: nec solum vniuersos, sed etiam singulos regis sui causæ bonitatē docent: & beneficentiam, & quæ inter reges ipsos Henricum & Philippum conuenerant proponunt. quorum summa hæc ferè erat. Regem Philippum, si Portugalix regnum, alioquin iure propinquitatis sibi debitum, spontè tradatur, spondere nec priuilegia, neque immunitates ciuitatum Portugalensium vnquam imminuturum; non mores, non leges, non iudicia commutaturum; eadem regni, ac regix munera, eosdemq; ordines militares retenturum. Magistratus non nisi Portugalensibus mandaturum: eisdemque Ecclesiarum, & sacrorum militarium ordinum dignitates & fructus distributurum. Magistratus omnes ciuitatum etiam se absente semper eodem, quo nunc, modo mandandos. Nulla ratione vectigal vllum ex Ecclesijs Portugalensibus vnquam exacturum. Idem sacerdotum collegium ad res sacras faciendas, quod reliqui reges, Olyssipone conseruaturum. Dominatum in alios, & regia iura nulli, nisi Portugalensi ciui daturum; & quæ ab aliquo ad ius regium bona redierint, ea non sibi addicturum, sed illius propinquis, aut alijs benemerentibus impertiturum. De rebus iudiciarijs, & pecuniarijs eodem, quo nunc, ritu in Portugalia iudicandum. In nummis non alia signa, quàm quibus Portugalensium reges semper

vſi ſunt, inſignia impreſſurum. In arcium præſidijs
 non niſi Portugalenſes collocaturum. Ad inſtruen-
 dam claſſem, cogendum exercitum, adminiſtran-
 dum bellum pro rep. Portugalenſi Portugalenſium
 opera uſurum, nauarchorum, militum, ducum.
 In Portugalia quoad licuerit ab aliorum regnorum
 cura manſurum: nec hoſpitia, quæ in Caſtella aſſo-
 let, imperaturum: ſed morem in hoc Portugalen-
 ſem obſeruaturum. Cùm abire contigerit, vnum
 aliquem ex iſſis Portugalenſibus, aut cognatum ali-
 quem & affinem ſuum regendis pro ſe regni guber-
 naculis relicturum. nec non filium ſuum ſtirpis re-
 giæ principem inter Portugalenſes educandum è
 Caſtella in Portugaliã, ni quid obſtiterit, miſſu-
 rum. Portugalenſium ordinum conuentus de regni
 negocijs non niſi in Portugalia acturum. Vbicunq;
 locorum fuerit, Portugalenſes homines apud ſe ha-
 biturum, per quos regni negocia conficiantur: &
 quæ ab his mandanda ſint tabulis, Portugalenſi lin-
 gua mandentur. Se more Dominorum Burgundo-
 rum Portugalenſes mares in famulatum ſuum re-
 cepturum: reginam verò Portugalenſes ſa-
 minas; easque deinde in matrimonio locaturum. At Por-
 tugalenſium regum more nobilium filios poſt duo-
 decimum ætatis annum apud ſe pro familiarũ or-
 dinibus, non nobiles in regijs claſſibus ſtipendia
 (quæ Portugalenſes moradias appellant) meritu-
 ros: ac ſingulis annis CC. Portugalenſes certis ſtipendijs
 in ſuum famulatum adſcripturum. Portoria con-
 ſigniorum Portugaliæ & Caſtellæ ſublaturum. Res

ad vitæ vſum neceſſarias ex Caſtella Portugalenſibus, quantum vtrorumque populorum commodā ferent, ſuppeditaturum. Poſtremò CCC. m. ducatorum in vſus pauperum, & captiuorum iſtis largiturum. Quas cōditiones aduerſarij regis Philippi calatas voluiſſent, ne qua eius benignitas appareret. Nec acceptæ ſunt tamen, quòd in diuerſas partes diuiſi eſſent. Quamvis enim eſſet omniū eadem voluntas natiuum regem habendi, tamen cū id fieri non poſſet, aut quamægerrimè poſſet, diuerſæ voluntates, & varia pro cuiuſque libidine ſtudia extitere. Antonium plebei amplectebantur, & nobiles aliquot: in quibus Ioannes Portugalis Episcopus Igæditanienſis, Franciſcus Portugalis Comes Viminolenſis, Emanuel Portugalis, Didacus Meneſius, Emanuel Sylua, Didacus Botellius. Pauci Catharinæ Ducis Brigantini vxori ſtudebant, ſcilicet, neceſſarij, & conſanguinei, quiq; à Duce Brigantino beneficia habebant, vel accepturos ſe aliquando ſperabant. Maxima pars nobilium vel cernentes vires Portugalenſium modicas eſſe, quibus regi Philippo reſiſteretur, vel eius cauſam probantes, vel magnorum præmiorū ſpe adducti eius partes ſequebantur, clam tamen, quia plebis inuidiam ob commune in Caſtellanos odium extimeſcebant. Sed & nonnulli, qui publicam pacem & tranquillitatem amare videbantur, iuri ſtandum aiebant. Cuius quidem charitatis ſpecie bonorum & ſimplicium hominum volūtaſes à rege Philippo facilius alienabant. Quidam præterea cenſebant

nouum

*Igædit.
vulgò
de la
Guarda.*

nouum regem creandum. Quidam etiam nulli ad dicti, atque ab omni negotio remoti in pagis, ac villis exitum rei expectabant. Nec Gubernatorum idem erat omnium sensus, eademque voluntas. Nā Georgius Almeida indifferens erat, neque vllam in partem mouebatur: Ioannes Telius contra regem Philippum stabat: reliqui pro rege Philippo, sed, ne in populi offensionem incurrerent, à rege Philippo alieniores se simulabāt. Verū vt regno prouidere viderentur, Portugaliz partes suis quamque du-
 cibis custodiendas distribuerunt. Cuius rei gratia libet Portugaliam in suas partes diuidere. Portu-
 galiam Scriptores in Translaganam, Cistaganam, *Transl.*
 & Interamnem discreuerunt. Translagana ea pars *vulgò Alente-jo.*
 est, quæ fluminibus Tago & Ana, finibusque Ca-
 stellæ continetur, quos Seuerus fluius exiguus ter-
 minat: atque à meridie coniunctam habet Algar-
 biorum, qui olim Turdetani appellati sunt, regio-
 nem, quæ Oceano abluitur. Cistagana verò flumi-
 nibus Tago & Durio, atque occidentali Oceano
 clauditur. At Interamne inter flumina Durium &
 Minium iacet, ecclesia Bracarensis illustris; à qua
 etiam Callæcia Bracarensis nominatur: eique con-
 tinens est regio Transmontana; in qua Brigantium
 est oppidum insigne, amplissimi Ducatus caput.
 Quare Portugalia nec totam Lusitaniam continet
 (nam extrema Castella pars Lusitaniz est) & partē
 Hispaniz Tarraconensis amplectitur, nimirum eā,
 quam Callæciam Bracensem nominari diximus.
 Igitur Gubernatores Interamnem Ludouico Brito,
 Trans-

Transmontanam Ferdinando Menefio, Transtaganam Didaco Menefio, Algarbium Odoardo Menefio, & quod in Transtagana oppidum est, Cetobrica olim appellatum, nunc Detubal, situm ad finem, quem in terram influens ab occidente Sole Oceanus efficit, Antonio Munio Barreto commendarunt. In urbis Olysiptones, & fluminis Tagi, & vicinarum maritimarum orarum, quæ in Cistagana sunt, custodia, cui Petrus Cugna à rege Henrico præpositus fuerat, posuerunt etiam Emanuele Portugaliū & Tristānum Vasaū: quem etiam præfecere arci, cui nomen à sancto Iuliano, in ipsis Tagi faucibus. Munitioni, quam contra hanc arcem è terra & lignis extruxerant in parua, humili, & arenosa insula, Cauezzasicca nominata, Petrum Barbum præposuerunt. Quæ extra fauces est intra magnum promontorium arx ad oppidum, quod Calcale vocant, à quo ipsum promontorium postea nomen accepit, eam Antonio Castrensi concediderunt. Atturres, alteram, quam Bethlem nuncupant à templo, quod nascenti Christo dictum diximus intra fluminis claustra in dextra ripa, Ferdinando Syluiō, alteram, quam veterem appellāt, è regione Bethlem in altera fluminis ripa Roderico Laurentio Tauaræ custodiendas tradiderunt. Prætereà Conimbricam Petro Guedio Sosæ, Lauarem Iōanni Vasconselæ, Lamecam Francisco Almeidæ, oppida in Cistagana; atque alia alijs defendenda commiserunt. Adhæc Franciscum Barretum in Galliam miserunt ad reginam Catharinam & Henricū eius

Lauare

vulgò

Auciro

Lameca

vulgò

Lamego

eius filium III. Gallorum regem: quibus Portugalē-
 sium regis Henrici mortem nunciaret, & rerum sta-
 tum exponeret, ac fidem faceret Portugalix Guber-
 natores in denūciando rege nulli iniuriam facturos;
 simulq; auxilia posceret contra eos, qui vi vellent
 Portugaliam petere. & Petrum Dorum, qui Olyf-
 sipone Consul Gallorum erat, illi socium adiūxere,
 quocum multa secretò transegerant. mandarunt
 etiam quoscunque posset milites Gallos in reditu
 secum conducere. Insuper optimatum concilium
 instituerunt, in quo de defendendo regno consilia
 haberentur. Hac vsi diligentia Gubernatores visi
 sunt regnum velle munire, ac contra regem Philip-
 pum arma parare: tamen neq; ad conducendos mi-
 lites Barreto pecuniam dederunt, nec præfectis re-
 gionum, oppidorum, & arcium ea, quæ ad pro-
 pugnationem & defensionem vsui forent, suggesse-
 runt, hinc populi Portugalensis odium, hinc regis
 Philippi potentiam & offensionem reformidantes.
 vnde nec cum pace illi regnum detulere, nec bello
 regni possessione prohibuere, neutri ob id chari. Et
 rex Philippus post nunciatam regis Henrici mortē
 creauit imperatorem exercitus Ferdinandum Al-
 uarum Toletanum Ducem Albæ, vnum ex prima-
 rijs totius Hispaniæ, ac rei militaris scientissimum
 virum: eumque iussit in extremos fines Castellæ,
 quibuscū Portugalia continens est, proficisci, ibiq;
 totum exercitum maturissimè contrahere. Tum
 etiam ad Alfonso Peretium Gusmanum cogno-
 mento Bonum Ducē Metimnæ Sidoniæ in Batica
 confi-

*Metimna
 Sidonia
 olim Asy-
 la.*

*Paxaug.
hodie
Badajos.*

*Caurita
hodie
Coria.*

*Mirobr.
hodie
Ciudad
Rodrigo.*

*Beneuen-
te olim
Maliaca.*

*Tyde
vulgò
Tuy.*

confini Algarbijs; & ad Petrum Portocarrerum Marchionem Villanoux, & ad Petrum Velasum Paxaugustæ præfectum, & ad Beltranum à Cuenca Alburquequensium Ducem in extrema Castella Transagani Portugalesibus finitimos; & ad Petrum Gartiam Episcopum Cauritanum, & ad Rodericum Paccecum Marchionem Seralui, & ad Hieronymum Fontium præfectum Mirobricæ partim in nouæ, partim in veteris Castellæ finibus vicinos Cistaganis; & ad Didacum Henrichium Gusmanum Comitem Albæ, & ad Io. Alfonso Pimentelium Comitem Beneuentanum in eisdem veteris Castellæ finibus Trasmontanis propinquos; & ad Gasparem Portocarrerum Comitem Montis regij, & ad Gartiam Sarmetum Sotomaiorem Dominum Saluaterræ, & ad Didacum Thurecremarum Episcopum Tydensum, & ad Petrum Fernandum Castrensem Comitem Lemi in Callæcia Interamnenfibus proximos scripsit, vt quas possent copias cogerent, atque in armis ad omnem casum paratas haberent: rem frumentariam curarent, neque in Portugaliâ vlla cibaria inferri sinerent: flumina, loca, regiones, oppida, arces Portugaliæ benè perspicerent, ac diligenter fines suos custodirent; & Portugaleses omnes, quotquot in fines suos introirent, obseruarent, qui, cur, qua via, ac quomodo aduenirent. cæterum amicè & beneuolè se cum Portugalesibus gererèt, & de æquitate suæ causæ illos docerent, ac promissis & beneficijs allicerent. Atque etiam statuit Paxaugustam ire, oppidum in extrema Castella Portugaliæ

tugalix proximum, vbi exercitus componendus erat, vt velamicè, aut vi Portugalix possessionem adiret; ac si vis vlla adhibenda esset, illam sua præsentia temperaret. Nam omnino ius suum exequi statuerat, bono tamen modo, vt neque in negligendo stoliditas, neque in repetendo reprehenderetur acerbitas. Itaque III. Non. Martij Madridio proficiscitur: ac reginam cum liberis subsequi iubet. atq; ad ædem S. Mariæ ad Aquas Lupias veniunt: in qua regi Henrico iusta magnificè persoluunt. At Portugalix Gubernatores vt regem Philippum Madridio profectum, & Portugalix finibus appropinquare audierunt, Gasparem Casalem Episcopum Conimbricensem & Emanuele Melum Oratores ei obuiam miserunt, qui illum orarent, vt ne armis Portugaliam peteret, sed denunciationem expectaret, quæ in totius regni concilio quam proximè fieret. Oratores regem Philippum ad Aquas Lupias conuenere; atque illi quæ in mandatis habebant exposuerunt, vt armis abstineret, denunciationem expectaret. Gubernatoribus fas non esse regnum cui velint ipsi tradere, sed cui delecti à rege Henrico iudices adiudicauerint. idque eos se facturos iurasse. Sin aliter agerent, non modò iusurandum violaturos, sed etiam regni competitoribus iniuriâ facturos. atque etiam si vellent asque iudicibus illi regnum tradere, nihilominus absque totius regni concilio id facere nullo pacto posse. Adhæc æquū esse ipsum regem Philippum vnà cum alijs competitoribus causam ijs iudicibus committere, qui inter

*Madrid:
olim Mā-
tua Car-
pentano-
rum.*

ipſos conueniant. Quibus rex Philippus reſpondit, Laudare ſe Gubernatorum in remp. ſtudio, quod ex ipſa legatione intelligit, atq; optare ſibi fas eſſe ipſorum poſtulis ſatisfacere, ſicut omnibus in rebus morem geret, quarum æqua, & honeſta erit poſtulatione: tamen neque ius ſuum ferre, neque regni utilitatem pati, vt illis de his, quæ poſtulant, obſequatur. Verùm illos pro æquo & bono facturos, ſi, cùm ius ſuum optimum, & iudicem cauſæ nullum eſſe idoneum agnoſcant, cuius ſententiæ ſtare oporteat, regnum ſibi deferent, nec moram vllam interponent; quando omnis mora magnum rebus ſuis procreare periculum poteſt. Nec iuriſiurandi religionem, qua ſe aſtrictos aiunt, vllam cenſeri: quoniam vanum eſt iuſiurandum, quo quis iurat ſe id facturum, quod fieri non poteſt, aut certè non debet. Itaque ſe illis ſuadere, vt omni mora reiecta ſibi regni à Deo dati poſſeſſionem tradant, & fidẽ publicam dent. id quod etiam rex Henricus faciendum ab illis iudicauit. Debere autem ipſos & ad Dei voluntatem, & ad regis Henrici ſententiam ſuos ſenſus & animos accommodare. Quod ſi fecerint, quemadmodum eos facturos pro ipſorum probitate & prudentia ſperat, ſe illos multis beneficijs ornaturum, non ſolùm ijs, quæ à Duce Ofunæ propoſita ſunt, ſed etiam alijs, quæ honeſta, & opportuna fuerint. Deinde poſt datam funeri auunculi operam ex Aquis Lupijs profectus, Emeritam petit. Eumque ruruſum legati Emeritæ conueniunt: eadem, quæ antè, poſcunt, vt bello ſuperſedeat, cõuentum

*Emerita
vulgo
Merida.*

uentum regni fieri patiatur, renunciationem expectet. Gubernatores non posse aliter illi regnum deferre & iurisiurandi propria religione, & aliorum ratione. Quos rex iisdem responsis, quæ antè dederat, à se dimisit. Ac mox Emerita discedens, Paxaugustam III. m. pass. hinc à Portugaliæ finibus peruenit, vsus lentis itineribus, vt spacium esset contrahendi exercitus. Et Portugaliæ Gubernatores quatuor (nam quintum Ioannem Telium Collegam Olyssiponem præmiserant, qui eius Ciuitatis rebus præesset) initio mensis Iunij ex Almerino Setubal abierunt. vbi totius regni concilium indixere. A quorum discessu Antonius liberius sese gerere cœpit, non iudicium sententias, non Gubernatorum decreta, non denunciationem vllam regis expectare: conuenticula habere, Procuratores ciuitatum à concilio retrahere, nunchos, nunc illos ambire, blanda oratione quemque appellare, &, si se regem fecerint, magna omnibus præmia polliceri. Eius studia rex Philippus intelligens, & Gubernatorum dubios animos cognoscens, ad Ferdinandum Aluarum Toletanum scripsit, qui Ellerenæ haud longè hinc erat, ex vicinis Baticæ maritimis oris, & stationibus copias colligens, ac res belli proprias administrans, vt properaret omnes copias contrahere, atq; exercitum ad Paxaugustam componere. Toletanus Ferdinandum filium cum Sancio Auila militiæ magistro & Baptista Antonello architecto Paxaugustam ad deligendum castris locum misit: ipse interim militum numerū iniuit. Recensita sunt

II. m. equitum , peditum XXII. m. præter VI. m. rusticanorum hominum , qui ferramenta ferebant cùm ad alios vsus , tùm ad sternendam viam , per quam bellica tormenta pertraherentur . Hispanorum accersitorum ex præsiðijs Mediolani & Neapolis III. circiter m. quorum præfecti Petrus Sotomaior, & Petrus Gonzales Mendoza : collectorum verò in Hispania X. m. quibus præerant Ludouicus Henrichius , Gabriel Nignus , Antonius Morena , Petrus Ayala. Germanorum III. m. & D. sub imperio Comitiss Hieronymi Lodronis . Italicorum IIII. m. & D. quorum præfecti Prosper Columna , Vincentius Caraffa , Carolus Spinellus Petro Medici parebant . Et si enim longè plures Itali & Germani nauibus aduecti fuerant , tamen ad Calpem iuxta fretum Herculeum in statuis magnam eorum partem vis morbi absumpserat . Postquàm Ferdinandus filius locum castris delegit in planitie , quæ inter flumina Seuerum & Anam iacet, vulgari nomine Cantillana , eò exercitum conduxit, & tormenta ænea LIIII. cum magna copia pulueris tormentarij, quibus Franciscus Alaua præerat ; & ad pertrahenda ipsa tormenta carros D. & ad ferenda cibaria carros ad VI. m. Simulq; Aluarum Bazanum regis classis præfectum litteris monitum fecit , vt classem ad omne imperium instructam paratamq; haberet . At Portugaliæ Gubernatores nec regi Philippo regnum deferunt, nec se contra eius arma muniunt, neq; de defensione, neque de deditioe cogitant. Et concilium, quod de regni defensione instituerant,

*Calpe
vulgò
Gibraltar.*

stituerant, non ad prouidendas res bello necessarias, sed ad excitandos populorum animos contra Castellanos frequenter conuocatur. In quo multus est Martinus quidam Gonzales, vir sacris initiatus: cuius consilio litteræ ad Episcopos ciuitatum, & religiosarum familiarum præfectos scriptæ fuerant, vt concionatores in templis populum ad defendendam communem libertatem & salutem adhortarentur. Vnde à multis sæpe contra regem Philippum & Castellanos habitæ sunt orationes non pietatis & religionis, sed odiorum & iniuriarum plenæ. Rex Philippus rebus omnibus ad bellum comparatis, tametsi populi Portugalensis temeritas, Gubernatorum tarditas, Antonij machinationes omnem cunctationem reiicere, quæ multorum bonorum sæpe parit amissionem, & exercitum in Portugaliâ quamprimùm immittere suadent, tamen priusquàm id faciat, vt æquitatem sequi, non vim suscipere videatur, Gubernatores præmonet se posthàc nihil cunctaturum, quin in Portugaliâ à Deo sibi datam ingrediatur; cùm omnis temporis dilatio plena periculorum sit. Sole clarius esse astu peti à se vt denunciationem expectet, vt interim auxilia contra se comparent, vel casus aliquis interueniat, qui regni possessionem impediât. Regni concilium in mensem Maium ab ipsis indictum: mensem Maium elapsum esse, ac nullosdum Antistites, aut Dynastas, aut ciuitatum Procuratores conuenisse. quinimmo permultas ciuitates adhuc nullos procuratores fecisse, nec facere velle. Se non ignore

rare

rare quæ à quibusdam Portugalensibus cum exteris hominibus contra se agantur. Sed neque sibi vtile classem, cum navigationis idoneum tempus est, inclusam in portu contineri, non maritimas oras Portugalix custodiri, non exterorum auxilia prohiberi, non inimicorum accessum vetari: neque æquum esse ingentem exercitum in eisdem locis diutius retineri, cibaria frustra consumi, fideles sibi Castellanos pluribus incommodis affici, ac bonos Portugalenses sibi legitimo domino parere volentes ab improbis ciuibus vexari, qui reip. tranquillitatem malis consilijs, & conatibus perturbant. Testificari tamē se nihil cuiquam hostile facturum, qui non ad vlciscendum, sed ad benè promerendum de suis Portugalensibus veniat. Quòd si qui fortè insolenter, & sine iudicio resisterint, eos debellaturū; reliquos summa charitate amplexurum, ac singularibus beneficijs ornaturum. Atque ad præfectos regionum & vrbium vicinarum Portugalix scribit, vt finitimis Portugalensibus ius suum in Portugalix regnum explicent, & Gubernatorum tarditatem ostendant: suam quoque mentem, & armorum consilium exprimant, quòd contra perniciosos homines tantum capiantur: postremò commoneant, vt se verum & legitimum regem haud repugnanter recipiant, à quo multis & magnis beneficijs afficiendi sint; non factiosorum hominum consilia sequantur, quibus aliquando se, ac sua bona perditum eant. Ipsosque præfectos facit procuratores, qui eos, qui se dedāt, in suam ditionem accipiant, & immunitatibus suo nomi-

nomine donent. Itemq; per legatos suos Portugaliæ Gubernatoribus denunciauit, vt sibi regnum traderent, ad quem probè scirent ab Henrici morte iure optimo peruenisse: neve posthàc regni bona, & vectigalia administrarent; quorum administratio ad se regem pertineat. Cæterùm nullo se modo laturum, vt illorum cunctatione ius suum deterius fiat. Sed Gubernatores huic ter à legatis factæ denunciationi nequaquam paruere. Tunc ad Eluios, & Oliuentinos proximos populos Petrum Velasculum Paxaugustæ præfectum cum litteris & iure procuratorio in suam ditionem illos accipiendi misit. Is primò Eluem VIII. m. pass. à Paxaugusta iuit: eamq; ingressus, in templum, quod iuxta portam est, concessit: vnde Episcopo, & vrbis præfecto, ac Senatui significauit se regis ad eos litteras ferre. Illi omnes eodem in templo conuenere: ac lectis litteris, quibus monebantur regē Philippum pro vero & legitimo rege Portugaliæ habere, ac fidem huius rei publicam Petro Velasco suo procuratori dare, vt in diuersas partes diuisi erant, sic in diuersas sententias discessere. Quidam obtemperandum, quidam repugnandum, quidam à Gubernatoribus responsum expectandum aiebant. Sed cùm Velascus tantum diem vnum ad consultandum concederet, Episcopus omnium nomine poposcit regis exercitum ad urbem propius adduci, vt apud Gubernatores & cæteros Portugaleses iustam deditiois excusationem haberent. Cui postulationi Velascus non concedendum ostendit, quòd exercitus facilè adduci,

sed

sed sine multis ipsorum damnis & incommodis reduci non posset; quòd maiorem gratiam à rege spòtè se, quàm vlla cum tergiuersatione dando consequerentur; quòd alijs ciuitatibus exemplum nò bonum daretur, quæ idem sibi concedi etiam peterent; quòd omnis tyrannidis species, quæ vim habet cū iniustitia coniunctam, à rege Philippo abesse debet, qui ius suum postulat. Sed dum noctis spacium ad deliberandum capiunt, Antonius Melus vr̃bis præfectus in arce Velascum ad cœnam inuitat; atque interim Gasparem Britum clam ad Ioannem Aceuedum Portugalix Architalassum, XVIII. m. pass. hinc, Extremutium mittit flagitatum contra regis Philippi arma subsidium. Quam rem Velascus ab amicis, & speculatoribus, quos circa vr̃bem disposuerat, cognoscens, statim ad Ferdinandum Aluarum Toletanum scripsit, vt manum expeditorum militum ad se quamcitissimè mitteret, quæ ab vr̃bis præfecto accersita subsidia præueniret. Aceuedus DC. pedites, & XL. equites; Toletanus II. m. peditum, & CC. equites eadem nocte misit. Vbi dies illuxit, conuocata concione Velascus conquestus est se hospitalitatis specie prodi, & cōtra regem Philippum copias in ipso consultationis tempore acciri. Tum eos cōmonuit ne à iusto & bono vel proprijs, vel alienis odijs impediuntur: à se contra maleuolorum audaciam satis esse prouisum. Dum hæc diceret, multa signa cohortium à regijs castris ad vr̃bem appropinquantium conspecta sunt. Vnde & verbis amicorum, & metu signorum victis Antonij Meli

Archita-
lassus
vulgò
Almirante,

Meli & suorum animis, regis Philippi nomen tota vrbe conclamatum est. Quamobrem cohortes regiz in castra reuerterunt, & quas Aceuedus mittebat, cū M.D. pass. abessent, regredi admonitæ sunt. quæ hoc indignantes Eluiorum agrum, quô vadebant, hostiliter vastarunt. Eluij Paxaugustam iuerunt fidem regi Philippo datum: à quo humanissimè accepti, ac magnis beneficijs affecti sunt. Velascus ad Oliuentinos profectus est. In his etsi nonnulli à rege Philippo, tamen plures à Catharina Ducis Brigantini vxore erant: atque in his Aluarus Pereira præfectus arcis pro patre suo Comite Tentubalensi. Proinde Velascum primò intra urbem recipere noluerunt: deinde receptum primores ciuitatis non modò audire defugerunt, sed etià comprehendere voluerunt. Ille ad plebem, quæ in foro erat, huiuscemodi orationem habuit. Merex Philippus ad vos Oliuentini mittit, quos suo nomine moneam, vt sibi vero ac legitimo regi parere velitis, ad quem à regis Henrici morte, cui sanguinis cognatione proximus erat, Portugalia iure peruenit. Quod quidem multis de causis facere debetis. Primùm quia æquum est obedire legitimo regi. & regem Philippum regis Henrici legitimum successorem esse tum ipsiusmet regis Henrici sententia, & voluntas declarauit, tum omnium ferè iuris peritorum scripta testantur. Deinde quia parèdo non tantùm vestris vtilitatibus, sed etiam totius regni tranquillitati consulētis. siquidem vestrum exemplum reliquæ ciuitates imitabuntur. Si obedi-

dientes eritis, pax totius regni ſequetur; ſi reſiſte-
tis, bellum incendetis, quod ſine dubio vobis om-
nium peſſimè ceſſerit. Nam vos Oliuentini, qui
belli periculis primi expoſiti eſtis, mala, quæ bellũ
afferre ſolet, primi ſubibitis. vos agros vaſtari, præ-
das agi, tecta incendi, mortales capi, & (quod
morte grauius eſt) veſtros liberos & vxores quæ
victori collibuerit pati ingenti veſtro cum dolore
cernetis. alij mox veſtro malo ſapere didicerint.
Nec equidem video quæ vobis opes ſint ad defen-
dendam urbem contra maximum & fortiſſimum
exercitum. Non ſoſſæ, non mœnia, non munitio-
nes ullæ, per quas miles non in urbem irrumpat.
non arces, non tormenta, non auxilia, quibus ad-
uerſariorum copias à veſtris ædibus arceatis. Cur
Oliuentini præcipites vos ac veſtros liberos, & vxor-
es in tantas miſerias fruſtra contra diuina, & hu-
mana iura proijcere vultis potiùs, quàm veſtri regis
gratiam inire; qui non ſolùm veſtras veteres immu-
nitates & priuilegia confirmabit, ſed nouis etiam
vos honoribus & beneficijs augebit? Nec video
cur ullam ſententiam Gubernatorum expectetis:
quorum nimiam tarditatem ſibi & alijs inutilem
vos ipſi videtis; qui etiam benè perſpiciſtis à regis
Henrici morte Portugaliam ad regem Philippum
legibus obueniſſe; & detrimentoſum ei eſſe tantum
exercitum in eiſdem locis in nullum uſum diutius
continere; atque interim pernicioſis hominibus tẽ-
pus dare contra ſe externos homines aduocandi.
Quamobrem Oliuentini ego, cui veſtra ſalus æquẽ
porro,

porrò, ac meorum ciuium curæ est, vos oro & obtestor, vt vobis sapiatis, nec contra verum & iustū nitamini, ac regis **Philippi** beneficentia vti malitis, quàm vim eius temere experiri. Mihi ipse rex **Philippus** ius procuratorium dedit vos in suam ditionem accipiendi, & vestra, & quæ à Duce **Osunæ** proposita sunt priuilegia suo nomine confirmandi. Hac oratione cùm plebis assensionem captasset, multis comitantibus ad propinquum locum abiit, in quem multos nobiles cōuenisse audiebat. quibus idem suasisit. ac vix dicendi finem fecerat, cùm **M. Antonius Iustinianus** **Ligur** alta voce regem **Philippum** regem **Portugalix** conclamauit: ac mox vna, eademque voce omnes eundem **Portugalix** regē conclamarunt. Ad quam vocem qui se in tectis abdiderant principes ciuitatis, in forum egressi sunt, atque in loco sacro fidem omnes suam regi **Philippo** dederunt. Altero die **Nunius Marinus** arcem, quam pro **Aluaro Pereira** tenebat, **Velasco** tradidit. Ac rex **Philippus** **Oliuentinos** eisdem, quibus **Eluios**, immunitatibus & priuilegijs donauit. Horum deditio, quorum exitum omnes expectabāt, permagnum momentum ad attrahendas alias ciuitates in ditionem regis **Philippi** attulit. Tunc **Portalegre** & **Campus Maior** vicinæ vrbes, in quas **Hieronymus Mendoza** cum eisdem litteris & iure procuratorio, quibuscum **Velasco**, missus fuerat, in regis **Philippi** ditionem datæ sunt; ac pleræque aliæ in extremis **Portugalix** finibus. At arx oppidi, quod à loci amœnitate vulgò **Villamuitiosam** nominant,

minant, Ducis Brigantini, ab habitatoribus prop-
 ter contagionem deſerti XVIII. m. paſſi à Cantillana
 Paxaugultæ, ſic capta eſt. Qui tormentis in arce
 præerat, notus erat Ciſnero cuidam in caſtris regis
 Philippi. Is illi multa pollicendo perſuaſit, vt ſe no-
 cte media in arcem intromitteret. Itaque cum de-
 lecta manu, quam Sancius Auila ducebat, tempe-
 ſta nocte ad Villamuitioſam acceſſit, ac quarta vi-
 gilia in foſſam, quæ arcem cingit, inſiliit, & ex ea
 ſcalas ad arcis murum appoſuit, ac ſummum cepit.
 Arcis cuſtos dormiebat; ſed multo militum & ar-
 morum ſtrepitu excitatus ex ſomno cõprehenſum
 vnà cum arce ſe ſenſit. Quæ res vniuerſis Duci Bri-
 gantino ſubiectis populis magnum terrorem inie-
 cit: qui magnum deſenſionis ſuæ præſidium in hac
 arce habere putauerant. Dum hæc in Portugaliz
 finibus geruntur, Antonius Scalabi familiares &
 amicos ſuos ad viſendum locum inuitat, qui vrbis
 propugnaculo designabatur in tumulto, qui iunctus
 mœnibus (nam oppidum in collibus poſitum eſt)
 Tago imminet. In quem cum populus conueniſ-
 ſet, ſutor quidam, ſicut inſtructus erat, eductum è
 vagina gladium, in cuius cuſpide pannum lineum
 candidi coloris infixerat, altè dextra extulit, ac ma-
 gna voce Antonium regem acclamauiſt. quam vo-
 cem reliqui excipientes ſimiliter illum regem accla-
 marunt, nequicquam eos inhibente oppidi præfe-
 cto. Ac mox cum eadem acclamatione Antonium
 in Curiam fractis foribus, quas quidam Senatores
 occluſerant, introduxerunt, & fidem illi publicè
 dederunt.

dederunt. Quod facinus nonnulli in Antonio quidem vt inconsideratum damnarunt, quòd causa cecidisset ex violato iureiurando, quo iurauerat se Gubernatorum decretis obtemperaturum: in Scalabitanis verò, vt intempestiuum reprehenderunt; quòd vel multo antè factum oportuisset, vt tempus ad muniendum se contra regis Philippi exercitum fuisset, vel expectandum quoad regis exercitus in Portugaliz fines ingressus esset, vt iusta causa Portugalenses ad arma pro communi defensione concitasse videretur. nunc regis Philippi causam ab Antonio & Scalabitanorū audacia factam esse æquiorē: illiq; datam ansam ad inferenda infensa signa in Portugaliam. Plures tamen factum laudarunt, & Antonium ad capiendum bellum contra regem Philippum impulerunt; inprimis Episcopus Igeditanienſis, & Comes Viminosenſis. quorum oratio his rationibus nitebatur. Quòd ab innato odio cōtra Castellanos Portugalēses omnes sub eius imperium vna mente animoq; concurrerent. atq; etiam Galli, Belgæ, Angli Hispanorum odio Portugalēſibus auxilio venirent. præterea Turca cum classe vel Siciliam, vel Italiam inuadens regis Philippi vires distraheret, atque imbecilliores redderet. proinde regem Philippū in Portugalia magnum exercitum habere multo tempore non posse. quem verò nunc habet, paruum, & inertem esse, ex Hispanis tyronibus confectum, ac multorum Italicorum & Germanorum morte extenuatum. Atque ex his, qui cōtra regem Philippum Antonium opposuere, quidam

quidam illi suaferunt, vt defensoris nomen, non regis acciperet. quoniam defensoris nomen in tot diffensionibus & motibus omnium auribus iucundius foret; & posset, si res aliquando postularet, sine vlla indignitate deponi: non item regis; quod, præterquàm quòd arrogantius est, si bellum malè cederet, nunquam pateretur in eas conditiones cum descendere, in quas rerum necessitas cogeret: quòd si ex sententia res succederet, tunc omnes illi ultro regis nomen & insignia delaturos. Verùm Antonius etsi primò professus est se non regem, sed communis libertatis defensorem esse, tamen deinde vel imprudentium hominum consilia sequens, vel sese nimium diligens, relicto defensoris, nomen regis accepit. Equidem leues homines ambitio faciliè vincit. Vbi verò rex à Scalabitanis est factus, in animo habuit Setubal ad Gubernatores ire, quos sibi adiungeret: sed mutata deinde sententia, non Setubal, sed Olyssiponem ire decreuit, caput regni, fretus ciuium voluntatibus, quorum exemplo alias ciuitates ad se attraheret. Quod Senatus Olyssiponenſis intelligens, Ioannem Telium, quem à collegis missum ex Almerino Olyssiponem suprà memoraui, id temporis commorantem Bethlem admonuit, vt in urbem veniret, atque Antonium introitu prohiberet, quem cum desiderio plebes expectaret. sibi satis virium non esse ad resistendum: & Petrum Cugnam urbis præfectum in ea defendenda remissiore factum; quòd urbis defensionē ad Gubernatorem pertinere diceret; ipse nec Antonio con-

traire,

traire, nec de suo munere argui vellet. Telius, quòd item nec Antonio aduersari vellet, nec videri suo muneri deesse, in urbem concedere noluit, sed ex vicinis agris milites cogi iussit. è quibus vna dumtaxat contracta cohors. cuius ducem Bartholomæum Oliueram D. pass. extra urbem via, quæ Scalabim est, considerare iussit; neque vllam rem aliam illi certam mandauit. ac Franciscum Telium fratrem suum cum Didaco Sosa venienti Antonio obuiam misit: cui suaderent nomen regis deponere, nec contra Gubernatorum voluntatem quicquam facere. Qui Antonio D. pass. ab vrbe obuiam facti, post consalutationem quæ Ioannes Telius mandauerat loquuti sunt. Ad quæ mox responsurum se Antonius dixit: mediusque inter illos repugnante nemine ad urbem processit: ac portæ appropinquans, quæ Moraria dicitur, à plebe rex salutarus, & in urbem exceptus, & in curiam more regio deductus est. In qua Emanuel Fonseca Pintus, Senator nonnullis nobilibus & magistratibus præsentibus hæc verba fecit. Castellanorum rex Portugalenses cum exercitu in Portugaliā ingressus est: neque voluit, neque vult de regni successione sententiam vllam expectare. Quare causa minimè extat, cur posthàc Gubernatores imperium gerant: & iurifurandi religionem, quo nos iurauimus Gubernatorum decretis & sententijs obtemperaturos quoad de regni successione dijudicatum fuerit, ego nullā ampliùs esse iudico. Sed vt Castellanorū regis violentiæ resistamus, nobis rege opus est, à quo defendamur,



damur , atque tegamur , ni velimus in manus ho-
 ſtium venire . Vos autem ipſi tanquam Portugaleſium
 principes , quando rex Henricus abſque legi-
 timo ſucceſſore deceſſit , & neceſſitas cogit , nunc
 abſq; aliorum populorum conuentu regem creare
 poteſtis , Ad cuius orationem omnes vno ore re-
 ſponderunt , Poſt regis Henrici mortem ſibi ſemper
 in animo fuiſſe regem creare Antoniũ , quod regis
 Emanuelis nepos ſit , Ludouici filius , multis , magniſq;
 virtutibus ornatus , à Deo etiam ex plurimis , gra-
 uiſſimiſq; periculis , quæ omnibus nota ſunt , erep-
 tus , & in hæc turbulentiffima tempora reſeruatus .
 His de cauſis ſe nunc ipſum Antonium creare Por-
 tugaleniſium regem : & creationem eiufdem regis à
 Scalabitanis factam approbare : atque ipſi profite-
 ri , & polliceri operam ſuam & ſtudium ad res om-
 nes bellicas , atq; ciuiles . Tunc ab eo petierunt , vt
 more maiorũ iuraret ſe ab alijs regibus datas Por-
 tugaleniſibus ciuitatibus immunitates , & priuilegia
 ſeruaturum . Quod ab Antonio protinus factum
 eſt . Deinde vexillum regium expandentes , & è cu-
 riæ fenestris efferentes , Antonium ter alta voce Por-
 tugaleniſium regem acclamarunt , & acclamari ab
 omnibus iuſſerunt . Poſt è curia in ſummum tem-
 plum illum adduxerunt ; atq; illinc per multas vr-
 bis plateas & vicos in arcem cum eadem acclama-
 tione , ac multo tubarum tibiærum tympanorumq;
 ſonitu deduxerunt . vbi vexillum regium colloca-
 tum eſt . & Fonſeca arcis clauẽ Hieronymo Pay-
 uæ eius præfecto Antonij nomine deinceps retinen-
 das

das tradidit . At Ioannes Telius vt Antonium in urbem ingressum , & regem creatum accepit , cum vno Didaco Lupio à Sequeira triremium præfecto (nam cæteri triremium nauiumque præfecti ad imperium Antonij sese applicuerant) prætoriam triremem conscendens Setubal adnauigauit . Sed illum Gubernatores & portu prohiberi , & oppido excludi mandarunt : postea tanquam priuatum ad dicendam causam in concilium admiserunt : & neglectiorem officij , & peruersitatem increpuerunt . Et Antonius ad omnes Portugalix ciuitates litteras scripsit , se communi omnium consensu Olyssipone regem esse creatum , sibi que posthac esse parendum : & ne quis deinceps Gubernatoribus pareret , aut alium , quam se , regem haberet , edicto sanxit , ijs , qui facerent contra , pœnam capitis adscribens . Magnis quoque pollicitationibus arcium præfectis suauit , vt ipsas vel in suam potestatem traderent , vel suo nomine retinerent . Ac quædam ciuitates in Antonij verba iurarunt , quædam à Gubernatorum authoritate discedere noluerunt , quædam sub regis Philippi imperium concesserunt , præsertim eæ , quæ in extremis Portugalix finibus sunt . Præfecti autem arcium vel ipsarum defendendarum desperatione , vel præmiorum spe , vel cognatorum & necessariorum verbis commoti illas Antonio tradidere . quanquam Tristanus Vascus aliquantum est cunctatus arcem Sancti Iuliani tradere : & Antonius Castrensis iam arcem Cascalis , cum primū Antonius à plebe rex creatus est , deseruerat . Cæterum

rūm Antonius ad alliciendos Gubernatorum animos, & cognoscendam oppidanorum voluntatem Comitem Viminosenſem Setubal miſit. Setubalēſium ſumma in Antonium voluntas fuit: at Gubernatores nulla ratione adduci potuerunt, vt ad Antonium accederent. Itaque ex vicinis pagis coactas aliquot cohortes Antonius Setubal præmiſit; monens ſe innox eōdem iturum. Quare tres Gubernatores cum aliquot nobilibus clam naui perſugerunt ad oppidum Aiamontem, quod in Bætica ad oſtiū fluminis Anæ eſt. quos Dux Metimnæ Sidoniæ, qui illi oræ præerat, benigniſimè exceperit. Archiepiſcopus Olyſſiponenſis & Ioannes Teliuſ, alter ſua dignitate, alter Antonij in ſe ac ſuos voluntate, conſiſi remaſerunt. Dux Brigantinuſ, qui neque cum rege Philippo, neque cum Antonio conuenire vnquam voluit, neque gratia apud nobileſ, neq; auctoritate apud plebem valens plurimū, timens aliquam ab Antonio indignitatem ad ſua ſe oppida recepit. Miniſtri regis Philippi diuerſis vijs alia alia Paxauguſtam abierunt. Antoniuſ cognita Gubernatorum & aliorum fuga, conſeſtim flumen tranſmiſit, ac Setubal contendit: receptuſq; magna cum pompa à Setubalenſibus eſt. At, qui Aiamontem perſugerant, Gubernatores in Caſtromerinum oppidum, quod contra Aiamontem in Portugalia eſt, iuerunt: ibique regem Philippum renunciarūt verum, & legitimum Portugaliæ hæredem; Antonium verò ſpurium, hoſtem patriæ, & perduellem. Id quod Aiamonte facere noluerunt, ne aut alieno loco,

loco, aut coactè id fecisse viderentur. Atque hanc suam renunciationem per Ferdinandum Norugnā nobilem Olyssiponensem regi Philippo significarunt. Dux Brigantinus vt Setubale excessit, ad regem Philippum suo & Catharinæ vxoris suæ nomine scripsit, quòd illi sua iura cederet, dum æqua præmia sponderet, quæ cum Antonio pacisci ab vniuersis Portugalensibus admonetur: rogauitque vt citò responderet, quòd maturè consultum rebus suis vellent. Cui rex Philippus respondit, se illi de discessu è Setubale gratulari, quòd indignitatem aliquam id loci tandem aliquando pertulisset. Iurium cessione verò sibi opus non esse. Sua iura ita per se firma & rata esse, vt nulla accessione indigeant. nihilominus se eius & Catharinæ rebus, vt propinquū decet, fauturum. Hoc temporis spacio Sebastianus Britus vrbs præfectus post Petrum Cugnam, qui relicta eius custodia in villam secesserat, cum multis collectitijs copijs ad oppugnandam arcem Sancti Iuliani Olyssipone profectus est: quæ ex omnibus vicinis arcibus vnà in potestatem Antonij nōdum tradita erat. Verūm Tristanus Vasæus, cum reliquarum arcium præfecti se Antonio deditissent, & idem ipse facere à cognatis & amicis rogaretur, atque insuper ab Antonio magnis præmijs sollicitaretur, quam Gubernatorum nomine hætenus tenuerat, posthàc Antonij nomine se retenturum arcem promisit. Itaque Britus dimissa obsidione in urbem reuertit. Antonius quoque compositis Setubalensium rebus, contra multorum consilium, qui

Setubali cum remanere voluissent, vt procul à regni sede bellum gereret, Olyssiponem redijt; ac solèni apparatu exceptus; eiufq; aduentu dies festus tota vrbe cum saltationibus & cantibus actus est, muliere æthiopissa similiū sibi fœminarum ducente cohortem, atq; infurnibulū pro telo gestante, vt illius mulieris memoriā referret, quā Portugalenses memorant olim septē Castellanos infurnibulo prostrasse. Atque huiusmodi ludicra, & arrogantix plena facinora in Castellanos contemptum permulta alia exhibuere, de se ipsis arrogantius gloriantes; nec modum tamen vllum, quo se ab illorum armis defenderent, inquirentes. Rex Philippus cognoscens quæ ab Antonio, quæque à multitudine in Portugalia fierent, quamuis statuisset bello interesse, tamen pro tempore mutato consilio, Toletano imperauit, vt si videret aduersarios non ex iure agere, sed velle vi regnum occupare, conseruandi ac defendendi iuris sui causa exercitum in Portugaliā inferret: atq; eos, qui se dederent, benignè reciperet, qui contra starent, armis subigeret. monuitque ne hostile quicquam faceret: vt nullus animus in nocendo infestus appareret, tantū in castigando seueritas adesset. Ac præcepit ne pateretur à quoquam segetes & frumenta, quæ maturuerant, corrumpi: quòd ipsi maiori vsui, quàm hostibus futura essent. Præterea edictum in Antonium & eius fautores, quale in perduelles proscribi solet, edixit. Toletanus è Cantillana Portugaliā versùs castra mouit: ac rex cum regina & liberis ad visendum

dum exercitum iter facientem M. circiter pass. Pax-
 augusta egressus est. Duæ hinc viæ Olysiponem
 Toletano monstrabantur, ad quam occupandam
 omnes cogitationes & vires intendebat, quippè re-
 gni caput, quacum vniuersam Portugaliæ cape-
 ret, altera per Scalabim, altera per Serubal. In illa
 hæc commoda: quòd capto Scalabi hostis à multo
 com meatu illicò intercluderetur, ac reliquum iter
 facile & expeditum foret. Sed à Toletano hæc dif-
 ficultates considerabantur, quòd nec pons in Tago
 facilè fieri, aut factus defendi; nec oppidum Scala-
 bis natura munitum, si quibusdam obuallaretur
 operibus, paruo negotio expugnari posset. timeba-
 tur præterea ne aduersariorum multitudo, quæ ex
 vicinis agris coiret, iter è Castella com meatum ad
 se ferentibus interfepiret. At in altera via multa in-
 commoda cernebantur: primùm oppidi Setubalis
 expugnatio; deinde arcis, quæ III. m. pass. distat ab
 oppido; tum in Cistaganam transitus, & in terram
 arduus è nauibus ad Cascalæ descensus; ac triū post
 arcium Cascalis Sancti Iuliani & Bethlem oppu-
 gnationes, quæ multum temporis laborisq; requi-
 rerent. Toletanus tandem hac via primùm eundū
 censuit, vt classi, quæ milites tormenta & cibaria
 multa comportabat, portum pararet. adhuc maris
 possessionē acquireret: vnde aduersarijs com mea-
 tum & auxilia intercluderet. insuper iunctis mari-
 timis & terrestribus copijs bellū terra mariq; vali-
 dior gereret. Et quoniam timendum erat, ne aut
 classis aduersa tempestate Sacrum promontorium
 supe-

*Sacrum
 Promō.
 vulgò
 Cabo de
 San Pic-
 te.*

superare non posset , ac Setubal in tempore aduenire , aut magna hostium manus in via occurrens iter suum remoraretur , cibaria in XL. dies portari voluit (cuius rei causa magnam vim carrorum comparauerat) & hostem, quicumque adesset, ad pugnam elicere proposuit, atque omnia, per quæ vaderet, loca præsidij firmare, vt tutò semper è Castella sibi commeatus adueheretur. Itaque II. m. peditum Petri Ayalæ cum C. equitibus sub imperio Martini Padillæ Castellæ Præsidis circumfines, qui Portugaliæ à Castella dirimunt, relictis, vt Eluios, & Oliuentinos, vicinosque illis populos in officio continerent, atque omnem impetum hostilem, si quem in exercitus terga fieri contingeret, propulsarent, iter Extremutium direxit. Oppidani conspectu exercitus territi sese dedere voluerunt: sed eos Toletanus sinè arce recipere noluit. Arcem Aceuedus, cuius suprà memini, tenebat, regi Philippo aduersus. Is primò pertinaciter restitit: deinde oppidanorum precibus fatigatus, ac præsidiorum militum virtuti & voluntatibus diffusus, nec non Toletani comminationibus permotus se, & arcem dedit. verùm ob peruiaciam in arcem Villæuitosæ captiuus missus est. quanquam nonnulli censebāt grauius de homine supplicium sumi oportere, vt eius pœna deinceps aliorum obstinationē deuinceret. Recepto Extremutio Toletanus ad oppidum perrexit, quod Montem maiorem nominant: vbi Didacus Menesius cum Comite Viminosenfi ciues ad pugnandum hortabatur. sed illi
vastita-

*Præses
vulgò
Adelan-
tado.*

vastitatem agri, & direptionem oppidi metuentes de deditioe cogitabant. quam, vt exercitus propius admotus est, fecerunt. Didacus Menesius relictâ Transtagana cum Comite Viminosenſi Olyſiponem ad Antonium abiit. Eodemque tempore Ciuitas Eborensis in Trâstagana nobilis, ac pleraque alia in Portugaliæ confinijs in regis Philippi ditione venerunt. Ex Monte maiore Toletanus Setubal perrexit. Quo explorato itinere Antonius milites, quos Scalabim antea miserat ratus hostem illac iter facturum, reuocauit, ac Setubal misit; duas etiam maiores & rostratas naues ad bellum aptas, quas Galeones vocant, vt vnâ cum arce portus ostium ab hostili classe tuerentur. At Toletanus Ferdinandû filium cum aliquot peditum equitumque cohortibus ad explorandum Setubalis situm præmisit. qui vt ad urbem accessit, inprimis fluentem in illam aquâ dulcem auertit. altero post die cum exercitu eodê ipse peruenit. positisque castris per præconem ante Setubalis mœnia pronunciari iussit, Se non ad inferendum bellum, sed ad capiendam eius oppidi possessionem pro rege Philippo venire, ad quem hæreditas Portugaliæ iure obtigerat. ne resistent, & contra ius eant, monere. Setubalenses primò resistere: ac portis egressi cum suorum nece vim hostiû breui certamine experti sunt: deinde vbi locata contra urbis mœnia quatuor ænea tormenta viderunt, magis suis bonis, quàm Antoni beneuolentiæ cōsulentes, ad Toletanum legatos de deditioe mittere, si vnâ cum suis bonis conseruarentur. sed cum

pactione

paŒtione Toletanus eos recipere noluit : & vt regis Philippi poteŒtati ac voluntati ŒeŒe committerent ŒuaŒit . Vnde qui vrbis præŒidio impoŒiti erant milites Galli & Angli, ad liberam deditionem inclinantem ciuium voluntatem cernentes, ne quam cõtumeliã à CaŒtellanis paterentur, per vrbis muros ŒeŒe demiferunt, ac nauibus, quæ ad litus religatæ erant, nocte Œocia diffugerunt . SetubalenŒes orta luce Œine vlla paŒtione ŒeŒe dedidere . quos Toletanus humaniter accepit, & conŒeruauit : cavitq; militibus ne cuiquam SetubalenŒi iniuriã facerent . quorum inŒolentiam & auaritiã cũ primò verbis cohibere non potuiŒŒet, aliquorum Œupplicio deinde repreŒŒit . De Setubalis deditione nunciuŒ incertuŒ & obŒcuruŒ OlyŒŒiponem allatuŒ vniuerŒam ciuitatem motu vario perturbauit . ac tres mulierculæ ad Antonium accedentes auxiliũ pro Œuis maritis orarunt : quos deŒertos à reliquis Œolos mœnia Setubalis ab vniuerŒo CaŒtellanorum exercitu defendere aiebant . AntoniuŒ ad Comitẽ ViminõŒenŒem oŒ conuertens, ipŒum rogauit vellet ne illarum mulierum maritiŒ opem ferre : eiq; annuenti iuŒŒit vt manum hominum pararet . Ad quæ verba conclamatuŒ ad arma eŒt . Concurrunt ad lituŒ iuuenes ac Œenes, armati inermẽŒque . naues vndique conquiruntur : aliæ in mare deducuntur, aliæ ad lituŒ attrahuntur . complentur Œubitò omnes . AntoniuŒ cymba vectuŒ cunŒtas circumit, geŒtitq; aŒpiciens multitudinem : nec tamẽ quid fieri debeat, aut velit imperat . Intereã nauis quædam ex alto portum

portum subire conspicitur: arrectisq; animis nuncium de Setubale certum expectant. Intelligunt pro certo Setubal Castellanis deditum. quo nuncio alijs ferendi auxilij studium relaxatur, alijs occultus metus dissolvitur. atque hora diei nona in terrā ē nauibus descendunt Solis ardore & inedia fessi. Ac nocte media rumor quidam pertulit Castellanos Olyssiponem aduentare: mox fama à nocturno timore maior effecta auxit omnia vana. diuulgauit eos adesse, tum vrbis portas ingressos cuncta diripere, atque corrumpere. Fit tota vrbe strepitus atque tumultus. Domus, vici, plateæ clamoribus & vlulatibus implentur. quid quisq; agat ignorat, contegentibus omnia tenebris, nec quid speret, aut timeat habet. Sed lux adueniens rei vanitatem aperuit; & cum tenebris metus euauit. Post hæc Simon Miranda dux eorum militum, quos Setubale diffugisse diximus, Olyssiponem venit; atq; omnia, quæ acciderant, ordine enarrauit: sed eum prodicionis accusatum Antonius in vincula coniecit. Toletanus postquàm oppido Setubale potitus est, arcē, cui nomen est ab Othone, III. m. pass. procul ab oppido ad ostium portus capere constituit: atq; huic negotio Prosperum Columnā præfecit. Arx Othonis ad radicem montis posita à sinistra sinus, quem (vt suprā dixi) influens Oceanus facit, latum III. m. longum XXX. m. pass. ipsa VI. m. pass. ab ostio, naues ab introitu arcet. Sed priusquàm tormenta locaretur, eius præfectus amicè commonitus est, vt ipsam vero Portugalensium regi traderet. At cū ad tra-

I dendam

dendam arcem nulla oratione induceretur, vi cogendus fuit. Verum in locandis tormentis duæ difficultates erant, altera ab asperitate loci. nam saxa perumpi, & solum inæquari oportebat. altera ab hostibus, qui ex arce & duabus rostratis nauibus, quas ab Antonio missas suprà monstrauiŒmus, vi ignis emissis ex æneis tormentis ferreis globis opus disturbabant. Sed labore & industria cum aliquorū iactura utraq; difficultas superata est. Inæquato solo, duobusq; tormentis locatis, alteram nauim, à qua plus incommodi accipiebatur, acriter feriunt, nautæ nauim, ne laceretur, sublatis anchoris apaisis velis in interiorem partem sinus agunt. Præfectus arcis proditionem factam credens nauim ignitis ferreis globis icit. quorū ictu malus cum antena perfractus aliquot sua ruina oppressit, aliquot vulnerauit. Post tertium oppugnationis diem Aluarus Bazanus cum classe LX. triremium; quarum VIII. Siculæ, quibus post correptum morbo Fabritium Columnam Alfonsus Leyua; XXII. Neapolitanæ, quibus Ioannes Cardona; reliquæ Hispanæ, quibus idem Aluarus peculiariter præerat; Gadibus profectus quo tempore Toletanus iusserat, atq; oram Algarbiorum præteruectus, oppidis, quæ in ea sunt, in regis Philippi ditionem receptis, aduenire conspectus est. Itaque præfectus arcis terramariq; obsessum se videns, deditionis conditionē à Prospero Columna petijt, vt inuiolatus cum suis abiret: atque impetrauit, insciente Toletano, qui, ni Prosperi Columnæ sponŒio intercessisset, illius auda-

audaciam punitam voluisset. Post arcem Othonis cum nauibus traditam Palmella proximum Setubali oppidum etiam Toletano traditum est. Ipse omnia, quæ capit, loca præsijs munit. Ac paulò post Alfonso Bazanus Aluari frater post fratrem Gadibus profectus cum XXX. onerariarum nauium classe, quæ multum com meatum ac bellicum apparatus portabant, Setubalis portum tenuit. At verò Gregorius XIII. Pont. max. secum agitans nec Portugalenses ob magnum in Castellanos odium sponte sub regis Philippi ditionem ituros, nec regem Philippum ius, quod in Portugaliâ habet, neglecturum, metuensque ne ex hac dissensione bellum oriretur, quod rempub. Christianam affligeret, Alexandrum Riarium S. R. E. Cardinalem in Hispaniam legauerat, ut regem Philippum & Portugalenses ab armorum contentione retraheret. Riarius pridie Kalen. Maij Roma profectus, terrestri itinere primum Barcinonem attigit. quò rex Philippus gratulatum illi in Hispaniam aduentum, & amici officia præstitum Lupium Auellanedam misit. Ille deinde & legationis suæ munere commotus, & multorum nobilium Portugalensium litteris ad componendam pacem sollicitatus, ad regem Philippum Paxaugustam aduenit. quem ægra valetudine affectum primis aduentus sui diebus adire non potuit: post meliusculè se habentem conuenit. atq; ita alloquutus est. Plurimam salutem rex Philippe tibi dicit, & apostolicam benedictionem Gregorius XIII. Pont. max. & cui optimè cupit, à

Deo quietam Portugalix possessionem exoptat. Ac certè magnam animo lætitiā cepit, cū intellexit regem Henricum statuisse te Portugalix regem denunciare: ac quando id à rege Henrico factum non est, quòd mortē præuentus sit, sperat ipsos Portugalenses victos ab æquitate facturos. Sed cū sæpe te per Nunciū suū admonuisset vt arma deponeres, ac iurisperitorum iudicio, quorum fides nulli suspecta esset, causam committeres; nec arma deposita, sed auctas copias ex multorum literis ac nuncijs acciperet, timeretq; ne relicto iuris certamine vim adhiberes, vnde Portugalensium odium magis accenderes, ex quo resp. Christiana turbaretur, & ipsa Portugalia prauis religionis erroribus inficeretur ab exteris nationibus, quarum auxilia accerferent, tum maiorum suorum exemplo, tum singulari in te beneuolentia motus me legatum ad te misit, qui suo te nomine commonefacerem, vt armis abstineres, nec solū tuorum iurisperitorum, sed aliorum etiam iudicio stares. quandoquidem regis amplitudo non in multorum regnorum possessione, quæ vi sua mutabilia sunt, atque ad diuersos transferuntur, sed in iustitia posita est firmissimo imperij fundamento. Non tamen ob id inquit vt arma abijcias, quæ contra iniurias iustè sumuntur, sed ipso iure nitaris: in quo nemo te omnium interpellare poterit. Atque ipsemet Pontifex omnem suam operam & auxilium contra eos pollicetur, qui tibi obstare voluerint. Sic & tu rectè regnare, & Portugalenses tibi iure obtemperare videbuntur.

debuntur. Cui rex Philippus ita respondit. Pontificis maximi voluntatem omnibus in rebus erga me semper optimā perspexi. Quare de paterno eius in me animo semper illi ingētes ago, & habeo gratias. Atq; equidem velim intelligat me primū iurisperitissimos omnes cuiusvis gentis etiam Portugalēses de meo in Portugaliā iure consuluisse, omnesq; respondisse sine vlla controuersia optimum esse. Quod deinde rex Henricus consultum & exploratum habens, me per Antonium Pineirū Episcopum Leriensem in concilio Almerini conuocato regem Portugalie declarauit. Ex quo permulti Portugalenses regnum mihi deferre voluerunt: sed aliquorum potentiorum verbis & minis deteriti sunt. Cū ergo ego viderem ex æquo & bono me ius meum obtinere non posse, rerum sacrarum peritos consului an mihi liceret ipsum armis persequi. & quamuis respondissent licere, tamen nullā vim facere volui, sed bonis verbis & promissionibus nunc æquitatem meæ causæ docendo, nunc immunitates & priuilegia pollicendo conciliare aduersariorum animos studui. Verū vbi Antonius finē dubio spurius sollicitare contra me plebem, & regnum capere vidi, ac magistratus alijs auferre, alijs mandare, exercitum in Portugaliā immisit tum ad capiendam regni debitam mihi possessionem, tum ad defendendos ab improborum iniurijs & maleficijs bonos subditos, qui parere iusto imperio volunt. Quamobrem arbitror me à Pontifice maximo reprehendi nullo modo posse, quod
arma

arma contra ius ceperim , aut vim iniuŒtam attulerim . Meam vitam omnibus notam eŒŒe , notos mores , notam mentem & animum : qui Œemper de meis bonis aliquid deperdere malui , quàm alicui quicquam auferre . Quinimmo mihi perŒuadeo , eùm me Portugalia potitum , & vtramq; HiŒpaniã Œub vnius imperio coniunctam viderit , non paruam ex hoc Pontificem maximum lætitiã capturum & propter eius in me Œingularem beneuolentiã , & propter religionis ChriŒtianiã maius firmamentum ac robur . Hoc reŒponŒo accepto Riarius , cùm Antonius regis nomen & regni aliquam peŒŒeŒŒionẽ à multitudine accepŒiŒet , ac regis Philippi exercitus in Portugaliã ingreŒŒus magnam regni partem occupaeŒet , nec decorum illi regium nomen & inŒignia deponere , neq; huic vtile victorem exercitum retrahere , incertus fuit quid ageret . ac quando rerum PortugalenŒium Œtatus ex eo tempore , quo legatus fuerat , immutatus erat , pro nouis mãdatis ad Pontificem maximum ŒcripŒit . Iam OlyŒŒiponenŒes rebũ Œuis diŒŒidere , audiẽtes Setubal , in quo Œatis roboris ad refringendos aduerŒariorũ conatus eŒŒe rebantur , breui tempore cum arce captũ , ac videntes ad reŒiŒtendũ regi Philippo Œibi omnia imbecilla , neque animi , nec conŒilij Œatis in Œuis ducibus eŒŒe , fidei etiam parum , etŒi iactantiã plurimum : auxiliõrum prætereã Œpem omnem extingui . quanquam ab Antonio bono animo eŒŒe iubebantur . IpŒe quoque Antonius videns omnia oppida , ad quã regis Philippi exercitus accederet , in illius

pote-

potestatem illico tradi, ciuitates, quæ ante sibi fidē dederant, nunc dubias esse, nobilem quemque ad aduersarios transfugere, apud se plebeios & inertes tantum remanere, atq; eos, quos vel desperatio veniæ, vel arcta necessitudo, vel metus amittendorum bonorum retinebat, quasi desertus ab omnibus timere grauius coepit: atque hoc etiam magis, quod magis externa auxilia desperabat. Nam Franciscus Barretus Olyssiponenſis & Petrus Dorus Gallus, quos à Gubernatoribus in Galliā missos supra memorauimus, nullas copias comparauerant. siquidem Olyssiponenſis nullam pecuniam acceperat, quam militibus, quos cogeret, daret: Gallus quam paucam acceperat, in suos usus conuerterat. Nec Galliæ principes venire portugalesibus auxilio velle aiebant, nisi duas arces sibi tradidissent Cascalis & Sancti Iuliani: in quibus receptum haberent, cum aduersi aliquid contingeret. Quam conditionem à Gubernatoribus recusatam, ne rerum Portugalesium aliquando Galli hac via potirentur, Antonius ad Barretum scripserat, ut acciperet: sed nec in tempore scribi milites, nec commodè mitti poterant, omni ad eum aditu ab aduersariis intersepto. Cum igitur externæ opis expectatio nulla amplius, aut quam minima relinqueretur, quotquot poterat colonos pastores operarios undique ad bellum cogebat: & ex ipsis religiosis familijs, quos ad bellandum idoneos reperiēbat, armabat: iubebat etiam clericos depositis togis saga sumere. Præterea feruos, quicumque militare voluissent, libertate donabat:

illisque

illisque facultatem concedebat à dominis arma & equos abripiendi. quorum IV. cohortes armatæ sunt. Sanciuerat quoq; edicto vt omnes in vrbem conuenirent: sed eorum, qui venire neglexissent, bona proscribebantur; ab his verò, qui venissent, pecuniæ in militum stipendia petulanter exigebantur. Mercatores iniquè vexabantur: peregrini asperè tractabantur, à quibus iuuari manu & consilio poterant. Cuiusuis delicti & sceleris pœna pecunijs redimebatur; omnisque via conficiendæ pecuniæ quærebatur. Dabantur obscuris & ignobilibus hominibus militiæ Christi insignia, magistratusq; indignis, & nouis Christianis mandabantur. Dominabantur in vrbe plebei, rapaces, & insolentes cum summa vitæ licentia & impunitate: ita vt in nouo regno vicem suam permulti dolerent, de regis ministris omnes viri boni magis, quàm de aduersarijs timerent. Quotidie conuocabant concilium, & nihil in eo decernebant: atque inter ipsos consultores inuidia dissensiones procreabat. Comes Viminosensis dux exercitus esse volebat, cui Didacus MeneŒius præfectus erat: & gratia, qua Odoardus à Castro diuitis mercatoris filius apud Antonium plurimum poterat, multorum animos alienauerat. dumtaxat noui Christiani à Iudæis oriundi, quorum maximus est in Portugalia numerus, & æthiopes, quos permultos OlyŒsipone cernas, gens seruilis & humilis, Antonium lubenti animo sequebantur. Rex Philippus verò vt æquitatem & bonitatem suam ostenderet, edicto veniam dedit, & impunitatem

ijs, qui aut vi coacti, aut errore decepti, aut cōmuni quodam odio contra Castellanos affecti contra se arma cepissent, rebellionis authores & adiutores excipiens. Quo multorum animi spe veniæ relanguescere cœperunt: & Antonius multis parū fidere; suspectosque sibi in custodia asseruare. in quibus Georgius Menesius maiorum nauium præfectus ob interceptas (vt ferebatur) ad regis Philippi ministros litteras. Toletanus interea circumspiciebat quam viam iniret, quæ Olyssiponem faciliior & expeditior esset. Nam tres com mōstrabantur, vna per Scalabim, altera per Tagi fauces, tertia per Cascale: quod oppidum XV. m. pass. infra Olyssiponem est in altera ostij parte, in quod Oceanus penetrans flumini Tago coniungitur. Viam per Scalabim longam, æstuosam, & puluerulentam esse intelligebat, & illac difficilem fluminis transitū; quod nec pontem habeat, quo pedibus transiri possit; & cymbæ, quas Hispali fabricandas ob hanc rem curauerat, aduectæ non essent; atq; adessent eadem difficultates, quas suprà indicauimus. In portus verò claustra per angustas fluminis fauces cū classe irruptionem sinè maximo damno & periculo fieri non posse videbat; quod sitæ à dextra & sinistra arces Sācti Iuliani & Cauezzę siccæ tormentorum ictibus introeuntes triremes aut lacerarent, aut vadis alliderent; ac maiores naues hostium in ipsis faucibus positæ mole sua introitum obstruerēt. At per tertiam viam breuissimum æstate media tractum cernebat; & arces, quæ inter Cascale &

*Hispalis
hodie
Sevilla.*

K Olyf.

Olyſſiponem ſunt, non magno negotio capi poſſe iudicabat; tantummodò excenſionem in terram timebat ob altas & præruptas rupes, quibuſtotus ille tractus litoraliſ continetur. Doctus tamen à locorum peritiſ ſupra Caſcale M. & D. paſſi, ſeptentriones verſus humilem quendam inter rupes locū, quem incolæ Marmam veterem nominant, aquis pluuijs, quæ in Oceanum deſluunt, exeuſum, ad quem binæ, aut ternæ cymbæ appellī poſſent, relictum eſſe ab aduerſarijs incuria, quòd nulla hominum memoria ne piſcatoria quidem nauicula eò vnquam appulſa fuiſſet, hanc tertiam viam probauit: ac terra mariq̃ue cuſtodias diſpoſuit, ne quiſ ad hoſtes transfugiens hoc ſuum conſilium enunciaret. Tum ſimulans velle Scalabim proficiſci, Germanos cum tormentiſ ea via præire iuſſit: moxq̃ue reuocauit: atq; in triremes quotquot potuit milites cum CC. equitibus & aliquot tormentiſ muralibus impoſuit; ac Caſcale adnauigauit, excenſionem in terram periclitaturus. egreſſuſq; Setubaliſ ſinum Siſymbram recepit, oppidum ad proximum lituſ ſituſ: atque altero die ſub ortuſ Soliſ Caſcale appropinquauit, & ad Marmam veterem prorauit. Didacuſ Menefiuſ, qui Caſcale & maritimā illam oram cuſtodiebat, cernens hoſtilem claſſem aduerſum ſe agi, cum VI. m. hominuſ ad Marmā veterem procurrat, deſcenſum in terram hoſtibus turbaturuſ. Sed accedentem eum hoſteſ tormentiſ è triremibus terrent. ſummotiſq̃ue magiſ inani terrore, quā vllò detrimento aduerſarijs, ſcaphæ militibus

militibus complentur : atque accedente æstu , & sereno cœlo ad litus appelluntur . E quibus in terram primus omnium Rodericus Zapata cum XX. sclopettarijs exiit , tum Sancius Aula cum L. militibus , & deinceps alij post alios : contentoque gressu decliuis ripæ summum repugnante nemine obtinuerunt . post auctis cæterorum concursu viribus hostem penitus fugarunt . Fugatis hostibus , reliqui milites exponuntur : compositoque agmine Cascale propius incedunt : inclinanteque ad occasum die , ad ædem sacram B. Mariæ , cui cognomen à via est , consistunt . Rodericus Valdesius tamen cum sua sclopettariorum cohorte longius progredi iussus ad depellendos hostes è tumulo , quem occupauerant inter ædem B. Mariæ & Cascale , magna eos vi atque impressione deuicit . quo in certamine de Castellanis quatuor tantum vulnerati sunt ; de Portugalesibus desiderati plures : reliqui procul ab oppido & arce , quò vel hostium metus impulit , vel locorum opportunitas ire suaserit , fusi fugatique abierunt . Menesius cum XX. militibus in arcem se recepit , quæ iuxta litus ab oppido sagittæ iactu abest . Huius rei nuncijs ingenti metu Olyssiponenses perculsi sunt : atque Antonio ad arma vocante magna hominum multitudo conuenit : sed eum hortantem omnes ut se Cascale contra Castellanos insequerentur , pauci , iidemque tumultuose , partim etiam inermes subsequuti sunt : quamvis diuersarum religiosarum familiarum plerique viri vel tranquillitatis odio , vel amore licentiæ , vel dementia & furore correpti ,

dextris gladios, ſiniſtris cruces geſtantes, vt hortatorum, & adiutorum officia præſtarent, vniuerſos & ſingulos ad pugnam contra Caſtellanos magnis vocibus & clamoribus adhortarentur. Vbi vêtum Bethlem eſt, minorem opinione ſua manum arma ferentium conſpiciens (neque enim plures, quàm M. pedites & D. equites erant) primores conſuluit an progrediendum, an redeundum cenſerent. In quibus etſi fortè quidam cæteris prudentiores magis temeritate quadam agi, quàm vllò conſilio duci ſe viderent, tamen audaciſſimorum vociferatio contendentium nulla ratione redeundû, atque inſolentiùs inſtantium ipſorum ſingulis animum eſſe cum vniuerſis Caſtellanis congredi, nullum conſilium dici ſinebat. verùm interueniente nocte cùm cibum capere voluiſſent, nec quicquã, quo reficerentur, inueniſſent, hoc vno incommodo refracta illorum temeritas eſt. Toletanus poſt expoſitas copias, & tormèta, quæ ſecum aduexerat, Bazano præcepit, vt triremes ad conuehendû reliquum exercitum & bellicum apparatus Setubal remitteret: atque Alfonſum Leyuam oræ maritimæ cuſtodix præpoſuit: nec non interim præfectû arcis admonuit (ignarus quòd eſſet in ea Menſius) vt arcem traderet, nec ſe temere perderet. Quod cùm ille facere noluiſſet, arx tormentis verberari cœpta eſt. Ad quorum içtus præfectus de deditiõne agere cœpit. cuius ſpecie aliquot Toletani milites in arcem introiuerunt, & vt ſine pactione ſe traderet ſuaſerunt: neq; hoc facere, illo volente, ipſi per

per vim arce potiti sunt: & imperatoris sui iussu vexillum candidum pacis insigne, quod Portugalenses post verberatam arcem extulerant, deposuerunt, & rubrum belli signum, quod ante oppugnationē illi erexerant, extulerunt, ut intelligeretur arcem non deditioe acceptā, sed vi captam esse. Menesius sese occultaerat: repertus autem per nuncium à Toletano petijt, uti atq; infimus miles tractaretur; atque etiam facultatem postulauit ad Antoniū, quem Portugaliæ regem nominauit, abeundi. Sed illi tunc à Toletano nullum responsum datum est (aderat autem nox) veniente verò die Toletani iussu indicta mors est. Ita qui pugnare timuit, & se dedere noluit, capite luit temeritatem, an stoliditatem dicam nescio. Arcis præfectus etiam cum duobus alijs suspensus est: reliqui ad triremes damnati. Contigit autem nobilem quendam Olyssiponensem cum XX. militibus ab Antonio subsidio Menesio missum concubia nocte cymbam ad arcis latus appellere, ignarum quòd ab hostibus teneretur, ac compellare militem in arcis vigilia stantem, rogareq; ut sibi portam aperiret. cui miles Portugalensis consulto ad colloquendum suppositus, ne aliena lingua suspicionem daret captæ arcis, respondit se portam aperiturum. in quam ille ingressus sensit in hostiū manus incidisse. Tunc pagus Syntra VI. m. pass. Cascali, XII. m. pass. Olyssipone distans ad radicem montis Lunæ Toletano traditus est. Qui locus arboribus amœnus, fontibus iucundus, regijs ædificijs clarus est, atque æstiuo tempore

Portu-

Portugalsensium regum delitiæ. Senatus Olyssiponensis videns rem in maximum discrimen adductâ, ne vrbs opulentissima fieret hostibus præda, cuius auiditas multò audentiores milites facit, Antonium orauit, vt cum ijs copijs, quas contraxerat, Castellanis obuiam irer. Antonius à Senatu pecuniam in militum stipendia primò petijt; quam nullam obtinuit, asserente Senatu ciuitatem sumptibus exhaustam esse: deinde ad componendum exercitum biuum postulauit. quò tempore milites omnes ad Bethlem conduxit partim spontè, partim vi ad X. M. Verùm cum artis militaris scientes homines Portugalsenses non haberet, nec audirentur alienigenæ rerum bellicarum periti, ne superiores vlla re Portugalsensibus viderentur, & ipse imperator parum inter arma exercitatus esset, quid ageret ignorabat. Quidam aiebant iuxta arcem Sancti Iuliani castra poni oportere, in cuius defensione ciuitatis salus, & totius belli summa consisteret, vt arx munimento exercitui, exercitus præsidio arcis esset: quidam longius ab vrbe discedendum propter multarum rerum opportunitates negabant. Quod consiliũ probatum est. Itaque castris locum inter Bethlem & urbem eligunt, & munitiones instituunt. Toletanus post aduectum è Setubale cum reliquis copijs omnem bellicum apparatus ad oppugnandam arcem S. Iuliani Cascali profectus, ad pagum nomine Oëram è regione arcis castrametatus est. Ac primo die Franciscus Alaua contra arcem X. tormenta locauit, dein altera X. tum his omnibus XII. adiecit,

adiecit, equitibus, quos Antonius ad disturbanda opera miserat, retro à Sancio Auila paruo prælio cōpulsis. Atque imprimis tres maiores & rostratas naues, è quibus hostes nonnulla damna iniiciebant, tormentorum ictibus ab arcis præsidio summouit: ac mox arcem magno imperu verberauit. Porro Tristanus Vascus arcis præfectus, quòd se diu sustinere non posse videret, æquam aliquam deditio- nis conditionem magna voluntate subiisset: verùm in ipso oppugnationis initio ex se conditionem vllā postulare non satis honestum purabat. Accidit au- tem, cùm scalæ & funes ab hostibus pararentur ad inuadendam manu arcem qua parte multis tormen- torum ictibus muro denudata erat, vt puella quæ- dam cùm matre visendi mariti causa, & à Toletano & à Vascò facta potestate, ex Oëra in arcem intrar- et, ac Vascò suaderet vt se Toletano dederet, quòd ille maximum & fortissimum exercitum haberet, ipse rerum omnium penuria laboraret. Exinde Vas- cæus in colloquium Toletani venit: atq; illū initio rogauit, cur more militiæ neminem ad se ante op- pugnationem miserit sciscitatum rationem, qua ar- cem teneret, atq; defenderet. Quod factum à se Toletanus asseruit; & per præconem sibi relatum fuisse, præfectū nolle arcem tradere. Ob hoc quæ- situs est ad suspendium præco: qui correptus ingenti metu sese occultauit. Post Vascæus explicuit quo mo- do arcem à Gubernatoribus primò acceperit, de- inde multis rebus cogentibus Antonij nomine te- nuerit, sed eo semper consilio, vt ipsam ei traderet, quem

quem Gubernatores Portugaliz regem denuncia-
 uissent. Hic Toletanus regem Philippum à Guber-
 natoribus regem Portugaliz denunciatum decreto
 in Castromerino facto ostendit. Tunc Vasæus re-
 tulit se arcem in regis Philippi potestatem traditurũ,
 si modò sui milites & necessarij salui & incolumes
 seruarentur. Insuper litteras ab Antonio ad se scrip-
 tas aperuit, vt cognoscerentur præmia, quæ sibi
 Antonius promiserat, ne minora à rege Philippo
 referret. Eam conditionem Toletanus approbavit,
 & de regis Philippi liberalitate illi plura, quàm spe-
 rare posset, pollicitus est. Sic arcem S. Iuliani Tri-
 stanus Toletano tradidit. Quod Tristani facinus
 nonnulli proditione notarunt, aliqui rerum ad se
 defendendum necessariarum inopia excusarunt,
 quidam etiam iuris æquitate & nobilissimorum
 exemplo laudarunt. Toletanus validum præsidium
 in arce posuit, & Tristanum apud se in honore ha-
 buit. Ac post receptam arcem maturè classẽ e
 sinu Cascalis intra Tagi claustra recepit. & quidem
 in tempore. nam alioquin paucis diebus post acce-
 ptam arcem immoderata tempestas ab Africo &
 Austro commota ad Cascalis litus illam foedissimè
 lacerasset. Et Petrus Barbus Antonij voluntate au-
 ferens tormenta, quæ potuit, munitionem in Ca-
 uezza sicca deferuit. Ergo vr̃bis ceruici imminen-
 tibus hostibus, ab Olyfsiponẽsibus iam mala omnia
 timeri, & direptio vr̃bis, & amissio classis, quam
 ex India & piperis & zinziberi & cinamomi &
 aliarum pretiosarũ mercium onustam expectabãt.

Proin:

Proinde Senatus Antonio deditionem suadere; contra Antonius & suorum militum multitudine, & externorum auxiliorum spe Senatum ad pugnandum cohortari. veritusque ne qua posthac molitio contra se fieret, fluminis transitum & vrhis portas suis præsidijs tenuit, fretus præcipue initiatorum hominum fide, quibus licentia militaris cordi erat. Cum verò omni sublato commercio res ad victum necessaria nullæ, ne ab ipsis quidem colonis vicinorum agrorum in Olyssiponem urbem maximam ac plenam humilium hominum inferrentur, à se ipsa quodam modo obsessa ciuitas graui rerum omnium inopia premebatur. Est in vrbe media mons prominens, & in eius summo castellum, in cuius custodia Belgæ positi erant. casu verò factum vt ignis recto inhærens flammam excitaret. quam Antonius cernens, proditionis signum esse credidit. ex quo elatus subita ira, non bene re perspecta, non solum Belgas, sed etiam omnes peregrinos ex vrbe expulit, vel eos, quorum opera sibi multis in rebus utilis erat. Ac quoque præfectum arcis Bethlem à custodia amouit, quem à Toletano ad deditionem sollicitari suspicabatur. Nec Toletanus castra ex Oëra mouerat, sed per notos vtrique homines Antonium multis iustis causis ad pacem adhortabatur, qui primum incertus ob dignitatis suæ rationem, & regis Philippi voluntatem extitit; sed amissæ arces, extincta spes externorum auxiliorum, militum paucitas & inertia, multorum quoque inconstancia tandem eius animum ad pacem inclinarunt. Igitur

L

tur

tur dies colloquio dicitur in medio flumine procul ab alijs, in quod cum paucis vterque conueniat. Toletanus totam noctem in regia triremi moratus est, vt in colloquium cum Antonio iret: sed ille nusquam comparuit, aut veniam à rege Philippo desperans, aut Toletano diffidens, aut ab Episcopo Igæditanienti reuocatus. Quod Toletanus grauius tulit: atq; exemplò Sancium Auilam cū M. & D. equitibus ad perspiciendam Bethlem arcē misit. qui M. & D. peditibus ac CCC. equitibus aduersariorum occurrens, præliū iniuit; diremptōq; paucorum iactura vtrinque certamine, ad castra reuersus est. Altero die maior militum numerus è castris ad Bethlem emittitur: quorum pars cum aduersarijs dimicant, qui ad turbanda opera venerant, pars tormenta contra arcē locant. Atq; inprimis tres maiores & rostratas naues, quæ iuxta sunt, remouēt; tū arcem tormentis percutiunt. quorum ictibus arcis præfectus perterritus se, & arcem tradidit, quam antè bonis verbis monitus tradere recusauerat. Sed eius confidentiam Toletanus suspensio damnaſſet, ni Alfonso Leyua interceſſiſſet. Capta arce castra ad Bethlem fecit: & vt classi liberum & ex omni parte tutum iter Olisiponem vsque eſſet, turris veteris, quæ in altera parte fluminis contra Bethlem est, præfectum commonuit, vt ipsam dederet; formidineſq; opposuit. Ille Toletani dicto audiens fuit. Postea cum M. & CCC. equitibus ac M. peditibus ad contemplandum castra Antonij, quæ à suis M. & D. passi. totidemque

Olyf-

Olyssipone aberant, profectus est. Locus, vbi Antonius castra fecerat, montuosus est, à Tagilitore consensu non satis arduo subuectus: per quem à Septentrionibus oriens fluuius brevis, humilis, & imbri crescens inter excelsa & prærupta saxa in Tagum defluit. Ipsæ rupes ad caput fluuij iunguntur, & in litus Tagi satis lato, ac pariter intervallò disjunctæ procurrunt: ac quâ desinunt, fluuius ponte, quæ Alcantaram nomine arabico vocant, transmittitur. cui continens est pagus, qui à ponte nomen Alcantaræ vnâ cum fluuiò accepit. Antonius in altera ripa castra fecerat, & munitionibus à dextra & sinistra obtexerat. nam mediâ ripa præceps rupe prærupta nullum accessum dabat. Pontem quoq; medium tabulis & asseribus obstruxerat. Ad alterâ ripam igitur Toletanus inspectum loci naturam & aduersariorum castra venit, pulso ex itinere hoste, qui armatus occurrerat: contemplatusque loci naturam & castrorum situm, atque à speculatoribus accipiens Antonium ad XVI. m. hominû in castris habere, sed magnam eorum partem colonorum, pastorum, seruorum esse, nec arma, nec armorum vsum habentium, contra eius castra sua designauit, ac certa quibusq; loca dispertiuit. Ad Alcantaram pagum Italos, supra Italos Germanos, in summa & mediâ rupe Hispanos, ad initium rupis equitatum locari; ac tribus locis tormenta disponi iussit, iuxta Germanos, iuxta equitatum, & in editiore tumulo prope Hispanos. Prætereà Bazano præcepit classem in ipso Tago contra aduersariorum maiores naues

atq; triremes instruere; ita vt classe & equitatu quasi duabus alistotus exercitus protegeretur. Equitatum Ferdinandus filius, Hispanos Sancius Auila, Germanos Hieronymus Lodron, Italos (nam Petrus Medices incommoda valetudine tenebatur) Prosper Columna regeret. Postquam omnia descripsit, in castra reuersus est; ac militum præfectis imperauit, vt sub ortum lucis suum quisque locum caperet; & cum pugnae signum daretur, Itali cum Germanis inferiores, Hispani cum equitatu superiores munitiones inuaderent, Franciscus Alaua tormentis aduersariorum ordines conturbaret, eodemq; tempore Bazanus hostilem classem adoriretur. Et quò infirmiores ad resistendum essent aduersarij, iussit Prospero Columnæ CCC. Italos ad pontem præmittere, qui leuibus iaculationibus totam noctem hostes insomnes haberent. Hortatus insuper est, vt viros se esse meminissent, atque hanc vnâ pugnam alacri animo susciperent, quæ omnium laborum finem allatura esset. Postremò multis orauit atque obsecrauit, vt si Deo iuuante hostes vicissent, ac fugatos depulissent, milites ab vrbe ingressu continerent: quam rex Philippus inuiolatâ, quàm captam omnino mallet. ac summum supplicium in eos constituit, qui ad depredandum urbem intrassent. Deprecatusque est Deum immortalem, vt mori prius sibi contingeret, quàm videre urbem à suo milite diripi. Post quæ Prosper Colúna CCC. milites ad pontem misit. qui paruis certaminibus Portugalenses totam noctem insomnes tenuerunt:

MOX

mox albente cœlo, magno impetu tabulationem, qua pons interclusus erat, perfringere conati sunt. Verum è moletrina, quæ in litore Tagi sita est, rectâ pontem prospectans, à Portugalensibus damnis afficiebantur. quod quidam animaduertentes, superato aggere, quo aqua continetur, vi moletrinâ cepere: atq; hinc in proximum hortum muris cinctum intrarunt, qui ad alteram pontis partem est. Sed è castrorum munimentis, quæ in consensu montis teli iactu à ponte aberant, magna aduersariorum manus irruens Italos è ponte disiecit: & contra eos, qui moletrinam & hortum occupauerant, acri Marte certabat. Intereâ Toletani exercitus aduenerat, & suum quisque locum ceperat, cum Prospero Columnæ nunciatur suos valida impressione à Portugalensibus è ponte disiectos; quosdam etiâ in summo periculo versari. Prosper ad pontem cum aliquot cohortibus accurrit; suis animum addit: quos orat, ut patriæ virtutis & gloriæ memores splendorem nominis Italici semper apud omnes gentes & nationes illustris nulla ignaviæ nota maculari patiantur. Itaq; acrior pugna redintegratur. Itali pontis tabulationem perfringunt, & aduersarios in castrorum munimenta propellunt. At Episcopus Igeditanienfis, audita ad pontem dimicatione, suæ personæ ac dignitatis oblitus per vicos & plateas urbis ingenti & crebro tympanorum sonitu omnes ad arma vocat: alios minis, alios vi ad castra cogit: cuncta summo strepitu & clamore miscet. Nec Antonius, quia non induxerat in animum hostem
ad

ad castrorum opugnationem tam citò venturum; suos ad repugnandum instruxerat. Sed & suorum multi nocte metu diffugerant, multi in urbem domus cura abierant. Cùm verò Italos cum Germanis ad hostium munimenta conscendisse, & Sanciũ Auilam cum Hispanis ad superiores munitiones appropinquare Toletanus videret, signum pugnae sustulit. ad quod Franciscus Alaua ingentem vim ignitorum globorum tormentis in castra hostium emisit, & à componendis signis eos deterruit: Hispani Germani Itali in Portugalsium munimenta irrupere. Portugalsenses summo metu vndique perculsi non manibus, sed pedibus salutem suam tutantes, abiectis armis sese fugae alius aliò mandarunt. Illi istos cedere, fundere, fugare. Et fugientium alij in fuga feriri, alij cadere, alij vitam amittere, alij mortem inter caecos expectare. multa quae à victore in victos edi crudelitatis exempla, quae furor fieri amat; ut ne suppliciter quidẽ petentibus anima interdum relicta sit. Tellus infecta sanguine, ac viae omnes telis, hastis, gladijs, sclopetisq; constrictae, & strata inter arma exanguia corpora. A tertia hora inchoata pugna, & vsque ad septimam facta strages VIII. Kal. Septembris. Ad DCC. interfecti, vulnerati plures: & quicquid circum Olyssiponem ædium est (sunt autem multa magnis ædificijs & hortis insignia suburbia) id totum direptum vastatumque est. Tantum templis & religiosarum familiarum domibus pepercerunt. Quin etiam urbs ipsa direpta fuisset, ni Ferdinandus Toletani filius

ad

ad portam accurrens, monendo, rogando, comminando, alios hostes à tergo esse confingendo milites ab irruptione prohibuisset. Post deuictas terrestres copias Bazanus, qui cùm pugnae signum à Toletano datum est, classem ad pugnam aptare, & in hostem agere propter recedentem maritimum aestum non potuit, accedente aestu aduersariorum classem faciliè deuicit. Tunc Senatus Olyfsiponensis ex vrbe Toletano obuiam prodiens, illi clauis urbis obtulit, ac regis Philippi potestati & voluntati sese commisit, persuasus à Toletano vt sine pactione sese dederet, cùm de pactione agere cœpisset. Itaq; Toletanus urbem accepit, atque incolumem seruauit. Deinde relicto in ea Ferdinando filio cum aliquot nobilibus, qui ciuitatis motibus prospiceret, ipse cum vniuerso exercitu in castra Bethlem se recepit. Antonius, qui urbem ingressus quotquot in carcere asseruabantur nocentes homines ruptis vinculis custodia liberauerat, confestimque egressus in villa sese abdiderat IX.m. pass. ab vrbe, post curatum illic vulnus, quod ex incursum armorum in fuga ad collum acceperat, Scalabim concessit. Sed Scalabitani, qui primi eum regem creauerant, tunc apud se retinere victum noluerunt. Ita hominum fluxa fides est, & cum fortuna mutabilis. Nec defuere, qui vel incuriam, vel animi trahendi belli in Toletano reprehenderint; quod nec ante pugnam quicquam cōtra Antonium præceperit, cùm pugnae ordinem institueret, neq; illum post victoriam conqueri curauerit: quando is vixit
totius

totius belli summam sustineret. Sed Toletani laudis fautores ipsum defendunt, quòd ante prælium non haberet, cui contra Antonium quicquam speciatim committeret; eò quòd suorum nulli notus esset: post victos verò hostes magna diligentia tota vrbe illum quæsierit, nusquam tamen inuenerit. Postquàm verò comperit Scalabim profugisse, tunc neque paucos milites, qui ab aduersariorum, quæ coisset, multitudine opprimerentur; cùm præsertim ex nuncijs certior fieret quatuor naues Gallorù ad Vianam, quàm aliqui Viennam Callæciam nominant, appulsas esse, quæ Antonio milites & arma portant: neque multos ad insequendum illum mittere conducibile existimauit, ne per quæ vaderent, loca deuastarent. Cæterùm Galli vbi intellexerunt Olyssiponem captam & Antonium victum atque fugatum, in suas oras remigrarunt. Et paucos post dies à deuicto Antonio clasis ab India venit, quæ non mediocri lætitia totam ciuitatem affecit. Ad cuius præfectum Antonius post amissam maris possessionem scripserat, vt ipsam vel in Galliam, vel in Angliam ageret: sed eam Alphonſus Bazanus à Toletano cum XV. nauibus Setubalè missus in itinere inuentam Olyssiponem secù adduxit. Post aliquot verò dies Toletanus intelligens Antonium Conimbricæ nouum exercitum cogere, Sancium Auilam cum CCC. equitibus & III. m. peditum, in quibus cum VI. bellicis tormentis III. Germanorum cohortes, ad opprimendum hominem misit. Qui aduentum Sancij resciscens;

cum

cum ijs copijs, quas contraxerat, Lauarem discessit, ac vi in oppidum introrupit, & ciues tributum ferre coëgit: atque insuper aliquos vinculis, aliquos supplicio affecit. Tum inde nauigare in Galliam statuit; sed amicorum suasionibus ab hoc proposito retractus, iter Portum contulit oppidū in Interamne nobile, situm in altera fluminis Durij ripa. quod à veteribus Cale vocatum est. Portuenses mœnia & ad urbē aditus, quibus Antonij aduentus erat, munerant: verū illi venienti partim metu, partim spontē patefiunt. Vnde ciues, qui rebus Antonij minùs fauerāt, portis effusi in diuersa loca sese proripuerūt. Quorum fuga audita confestim Antonius flumen transmisit, & in urbem apparatu regio acceptus introiuit: nec non magnum tributum ciuitati imposuit; & aliquorum domos diripuit. Dein iussit naues omnes atque nauiculas ad continentē ripam adduci, ne qua hostibus transeundi flumen potestas fieret. Prætereà Episcopum Igæditaniensem Odoardum Lemum & alios beneuolos sui misit ad comparandos ex vicinis agris & oppidis milites. Insuper ad ciuitates de rege Philippo, qui ægrotabat, scripsit, quòd mortem obierat: vt res bello necessarias libentiùs suppeditarent. Interim Sancius Conimbricæ appropinquans equitatum ad explorandos oppidanorum animos præmisit: qui reiecto Antoniano præsidio, ultro illum in urbē exceperunt. Hinc Lauarem perrexit: & ab oppidanis spontē receptus est. vbi paucos dies mansit, vt rei frumentariæ prospiceret. dein singulis cohortibus

M

tibus

tibus iussis VI. dierum frumentum secum comportare, ad flumen Durium iter contulit: & ex itinere misit cum aliquot militibus, & hominibus linguæ & regionis scientibus impigros viros Thomam Vcedū ad capiendas cymbas, quas hostis conduxerat ad vicum inter flumina Durium & Tamegam XVIII. m. pass. supra Portum; & Antonium Serranum ad conquirendas alias nauculas, quibus flumen trajiceret: peruenitque ad pagum, quem Villamnouā nominant, Portui oppositum in aduersa fluminis ripa. Ibi castra fecit, & vtrumque collem, qui à dextra & sinistra assurgunt, occupauit. Sed duplex difficultas eum circumuenit, & rerum, quibus famem depelleret, & cymbarum, quibus flumen transiret, inopia. Illa ad pugnandam quamuis pugnam stimulabat. siquidem militi optabilius videtur hostilibus armis cadere, quàm humanis necessitatibus interire. hæc omnem pugnandi facultatem adimebat. Vt verò cognouit VI. à Serrano ad moletrinam IX. m. pass. à suis castris, & XVI. cymbas ab Vcedo magno studio & industria ex hostium potestate captas, confestim ad Vcedum scripsit, vt secundo flumine dilabens ad ripam, quam Petram Salgadam nominant, M. & D. pass. à Villanoua eas appelleret, & cum nauculis Serrani coniungeret. Contra quæ Antonius cum IV. nauibus multos milites misit, vt ab hoste cymbas interciperent, aut labefactarent. At illi post primos tormentorum ictus, cum labor malè cessisset, retro cursum flexere, nec aduersariorum incursum expectarunt. Sed neque transitus, quoniam

quoniam Durius inter prærupta saxa fluit, ubiq; datur: & hostes aduersam Petræ Salgadæ ripam, qua Castellanos transitum attentaturos credebant, IV. bellicis tormentis, & IV. nauibus ad dimicandū instructis, quas contra Vcedum missas diximus, tuebantur. Doctus tamen D. pass. supra Petram Salgadam tutiorem transitum esse, illum tentare instituit: noctisq; silentio, quæ inceperat suum hostibus teget, eò cū exercitu ex Villanoua transuerso itinere profectus est: ac partem copiarum ad Petram Salgadam misit. quibus iussit, ut aduersarijs speciem transeundi præberent. atque Vcedo imperauit VI. nauiculas illis relinquere, reliquas aduerso flumine, quò ipse tenderet, agere. Vcedum hostes sclopettarum ictibus & è nauibus & ex altera ripa totam noctem prosequentes nequicquam turbant. Cū diei principium fuit, Sancius nauiculas militibus compleuit, & in aduersam ripā adegit. Hostes, qui in ripæ custodia erant, primò restitè, sed ubi de suis aliquos cadere viderūt, metu terga vertè. Sancius ripam tenuit: atq; extemplò illis, quos ad Petram Salgadam miserat, præcepit, ut transitū properè attentarent: se hostes à tergo adoriturum. Portuenses Sancium traiecisse flumen sentientes, atq; aspicientes reliquos hostes aduersum se nauiculis ferri, metuentes ne à tergo opprimerentur, licet numero plures essent, tamen quia virtute & arte inferiores, in fuga sibi præsidium omne posuerunt. Cuius fugæ initium ab Antonio factum est: qui nec suæ, nec suorum virtuti quicquam fidens,

statim poſt Sanciꝝ tranſitum primus in urbem pro-
uolauit; emētituſq; eſt Caſtellanos ad ripam victos
eſſe . ac protinus pecuniam, quantā potuit, aſportās
cum ſuis domeſticis & neceſſarijs Vianam profugit.
Sancius potitus vtroq; tranſitu ſuos in montes rece-
pit, vnde hoſtes ad VII. m. fugauerat . Poſt ad vr-
bem agmen admouit . quod aduerſarij ex oppido
multis tormentis arcere conati ſunt : ſed maximus
imber inutilia tormenta effecit. Tandem colloquijs
ciues ad accipiendū regis Philippi imperium indu-
xit . Atq; illico expeditiſſimos equites ad inſequen-
dum Antonium in diuerſas partes emiſit. Per id
temporis Epiſcopus Igæditanienſis, qui ſtipatus ar-
matorum manu ciuitatibus milites imperabat , di-
miſſis copijs , quas coëgerat , ſaluti ſuæ fuga late-
brisq; conſuluit. Idem quoque ab Odoardo Le-
mo factum eſt. Cæterū Antonius Vianæ nauim cō-
ſcenderat, & portu ſoluerat, vt in Galliam nauiga-
ret : orta verò tempeſtate reuerſus in litus excende-
rat. Interuentum autem aliquem hoſtium cauens,
in occulta loca cum ſuis vitabundus concedit : ſed
in paucos Sanciꝝ equites de improviſo incidit: e quo-
rum manibus, dum eorum animos pecuniæ, quam
multam fert , præda intentos habet , ignotus ela-
bitur . Ac deinde veſtem mutando , ac modò huc,
modò illuc itinera inſectendo non ſemel inſequētes
ſe hoſtes gnauiter eluſit . ac ſæpe etiam ab inſequē-
do ſpe pacis & deditiōis retinuit . Intereà rex Phi-
lippus è morbo conualuit. at regina Anna feбри cor-
repta ex hac vita reſceſſit, magnum ſui deſiderium
in

in marito relinquens. Porrò Deus mortalium lætitiā tristitiā miscet ac temperat. Pacata Portugalia Eluem aduenit. quo loci Dux Brigantinus salutatum eum venit. ipse post inuisit Catharinam Ducis Brigantini vxorem cōsobrinā suā in pago, cui nomen est Villaboina M. pass. ab Elue. Deinde Elue discessit: prætergrediensque Portalegrē & Abrantem, Tomar petijt, vbi totius regni concilium indixerat. Tomar est oppidum, quod veteres Neobantiam appellarunt, in Cistagana inter Scalabim & Conimbricā, ab hac XXXVI. ab illa XXIV m. pass. distans, in longā, sed angustā planitie: quam à dextra fluiuius non longè illinc oriens ablu- it, à sinistra colles vitibus & oliuis consiti cingunt. In quorum vnus summo, nempe eius, qui oppido imminet, templum est antiquum & augustum, ac templo iuncta ingens atque pulcherrima domus olim militum templariorum, nunc Christi militiæ Fratrum. In huius domus primo & maximo atrio regijs aulæis & peristromatis ornato Antistitū Dynastarum Procuratorum ciuitatum conuentus habiti sunt, sedente in solio rege Philippo ornatu regali. Atque in primo conuentu Antonius Pineirus Episcopus Leriensis hæc loquutus est. Inter cæteras prouisiones à Spiritu sancto Ecclesiæ, quam suo numine gubernat, significatas ad extirpandas prauas hæreses, componendos nouos motus, corrigendos malos mores semper experimento visa est optima patrum ritè, & Pontificis maximi omnium principis & pastoris autoritate conuocatorum congregatio.

gatio. Et quamvis conuentus à regibus, qui summū ius tenent, indicti certam adeò Spiritus sancti præsentiam, atque eam prærogatiuam nō habeant, quā à Deo sanctis patrum concilijs datam scimus, ne qua errent in statuendis & decernendis rebus ad cōmunem vtilitatem spectantibus: tamen de Dei bonitate, & prouidentia, quam singularem in regnorum institutione, administratione, & mutatione semper ostendit, sperare possumus, & debemus, quòd Spiritus sanctus etiam præsens aderit in regni concilio legitimi regis iussu conuocato ad consultandum de his, quæ ad veri Dei honorem, catholicæ fidei conseruationem & amplificationem, populi tranquillitatem, ocium, & commoda pertinent. Quorum sanè quidem rerum causa Rex noster coëgit totius Portugaliæ concilium. qui statim atq; in Portugaliam ingressus est, vt regni necessitatibus & vtilitatibus prouideret, non vt dominum, sed maiorum suorum exemplo se cum Portugalensibus vt patrem gerens, totius regni conuentum indixit; vt ex communi consilio statueret quæ reipubl. maximè profutura essent. Itaque vestra prudentia fide studio fretus sperat se à vobis de his rebus, quæ regni vtilitatem respiciunt, optima mente & animo summam Dei, ac regis, & regni rationem habente commonendum. Quantam verò nobis ipse magnorum beneficiorum spem dederit, indicat edictū ante regni concilium promulgatum: quo impunitatem omnibus concedit, qui vel decepti, vel inducti, aut compulsi pacem publicam violarunt, &

cum

eum de regni sui possessione turbare conati sunt . quod edictum ingenti nostro cum gaudio ab alijs audiuius, & legimus ipsi . Vnde quò maius fuit hoc beneficium, peculiaris eius innatæ clementiæ fructus, eò magis in nostris animis confirmauit suæ in Portugalenses beneuolentiæ & benignitatis magnitudinē . pro qua studebit vos in dies maioribus beneficijs & honoribus ornare & amplificare secundum vestram fidelitatē & obedientiam : quam satis sibi persuadet vos erga se & successores suos in omne tempus retenturos . Post Pineiri orationem ciuitas Olyssiponensis omnium regni ordinum nomine summa cum reuerentia Regi maximas gratias egit , quòd totius regni concilium conuocauerit ; in quo de rebus his ageret , quæ ad Dei cultum , & regni incolumitatem ac tranquillitatem spectant . Ipsique pollicita est veterem & constantem illā fidē, qua impensè reges suos omni tempore coluerunt . Tum omnes regi Philippo primùm , deinde eius filio Didaco regiæ stirpis maximo absenti , ac si præsens esset , iureiurando fidem suam obligarunt . Rex Philippus eorum veteres immunitates confirmauit, & quæ ante bellum per Ducem Osunæ obtulerat , priuilegia dedit : ac Ducem Brigantium creauit Portugalix Comestabilem ; illique omnia restituit, quæ bello amiserat . Postremò omnibus, qui contra se stetissent, impunitatem concessit : paucos exceptit , quos indignos veniam iudicauit . Peractis conuentibus, ad componendum regni statum Olyssiponem abiit : vnde paucos ante dies Antonius

nus deſperatis rebus ſuis latenter euadens, in Gal-
liam nauigauerat. Rex in urbem magnifica
& regia pompa exceptus eſt.

F I N I S.

Imprimatur.

Flam. Torc. Vic. Gener. Neap.

F. Petrus Robertus Theol. vidit.





Biblioteca
de Catalunya

Reg. 593.731

Sig. *Toda*
2-V-20

(4), 92 pp.

BIBLIOTECA DE



1001977

14071

